

四庫全書

史部

欽定四庫全書

史部

欽定續通志卷三十五

主事臣尹壯圖覆勘

總校官原任侍講臣王燕緒

欽定四庫全書

欽定續通志卷三十五

宋紀

高宗

紹興八年春正月戊子朔帝在建康丙申減臨安府夏
稅折輸錢戊戌張守罷辛丑偽齊知壽州宋超率兵民
來歸蔡州提轄白安時執其守劉永壽來降詔以方議
和好禁沿海州郡過淮招納戊申以兵部侍郎胡世將

為四川安撫制置使二月戊午減建康府夏稅折輸錢
蠲逋租和市科調庚申以呂頤浩為江東安撫制置大
使兼行宮留守癸亥帝發建康戊寅帝至臨安己卯以
戶部尚書章誼為江東安撫制置大使兼行宮留守呂
頤浩為醴泉觀使甲申減紹興府和市絹三月己丑以
知南外宗正事仲偁嗣濮王庚寅以禮部尚書劉大中
參知政事兵部尚書王庶為樞密副使壬辰復以秦檜
為尚書右僕射同中書門下平章事兼樞密使甲午陳

與義罷己亥蠲農器及牛稅以李天祚為靜海軍節度使交趾郡王丁未蠲所過州縣民積欠戊申蠲江西湖南諸州月椿錢夏四月庚申初置戶部和糴場于臨安壬戌遣王庶巡視江淮邊防五月丁未金使烏陵思謀石慶充與王倫等偕來戊申以資政殿學士葉夢得為江東安撫制置大使六月壬戌賜衍聖公孔玠衢州田五頃奉先聖祠事秋七月乙酉復命王倫及藍公佐奉迎梓宮八月甲子蠲江東路月椿錢冬十月丁巳劉大

中罷甲戌趙鼎罷丁丑金使張通古蕭哲與王倫偕來
十一月甲申以翰林學士承旨孫近參知政事丙戌遣
大理寺丞薛倬朱斐詣廣南路決滯獄戊戌王倫入見
己亥復以倫為國信計議使庚子以孫近兼權同知樞
密院事辛丑詔金國遣使入境欲朕屈已就和命侍從
臺諫詳思條奏甲辰王庶罷辛亥除樞密院編修官胡
銓名昭州編管壬子改差監廣州都鹽倉十二月甲寅
以趙鼎為醴泉觀使乙卯以宗正少卿馮楫為國信計

議副使己未以吏部尚書李光參知政事甲戌以端明
殿學士韓肖胄簽書樞密院事乙亥命肖胄等為金國
奉表報謝使丁丑詔金國使來盡割河南陝西故地通
好于我許還梓宮及母兄親族餘無需索令尚書省榜
諭庚辰帝不御殿命秦檜攝冢宰受書以進是月虛恨
蠻犯嘉州忠鎮若是歲始定都于杭州

九年春正月壬午朔帝在臨安

按前每年正月書帝在某府某州蓋以時方播

遷藉此以標進止而非如唐紀帝在房州之例謂做春秋書法也自此定都于杭故于九年之春一書帝在臨

安後遂不復書矣

丙戌以金人通和大赦河南新復州軍蠲其

租三年役五年以王倫同簽書樞密院事充奉護梓宮

迎請皇太后交割地界使戊子遣判大宗正事士儂兵

部侍郎張燾詣河南修奉陵寢庚寅賜劉光世號和衆

輔國功臣張俊加少傅安民靖難功臣韓世忠為少師

張浚復左宣奉大夫壬辰加岳飛吳玠並開府儀同三

司楊沂中太尉癸巳建皇太后宮甲午金宿州守臣趙

榮來歸丙申金主詔諭河南諸州以割地歸我之意戊

戊以王倫為東京留守郭仲荀為副戶部侍郎梁汝嘉
兼江淮荆浙閩廣路經制使己亥以吳玠為四川宣撫
使二月丁巳以郭仲荀為太尉東京同留守慕容洵寇環
州壬戌以李剛為湖南路安撫大使張浚知福州尋復
資政殿大學士為福建路安撫大使三月丁亥以和州
防禦使璩為保大軍節度使封崇國公丙申王倫受地
于金得東西南三京壽春宿亳曹單州及陝西京西之
地金烏珠還祁州辛丑以翰林學士樓炤簽書樞密院

事丁未正偽齊所改州縣名是春夏人陷府州夏四月
庚戌呂頤浩薨辛亥命樓炤宣諭陝西諸路癸丑落趙
鼎奉國軍節度使為特進仍知泉州以金陝西諸路節
制使張中孚為檢校少保寧國軍節度使知永興軍節
制陝西諸路軍馬甲子以觀文殿學士孟庾為西京留
守資政殿學士路允迪南京留守丙寅以孫近兼權同
知樞密院事五月庚寅奉迎東京欽先孝思殿累朝御
容赴臨安六月庚戌皇后邢氏崩于五國城辛亥夏國

主乾順卒己巳吳玠薨癸酉澧州軍事推官韓紉坐上
書論和議之失送循州編管乙亥以孟庾兼東京留守
王倫自東京赴金國議事樓炤承制以楊政為熙河經
畧使吳璘為秦鳳經畧使仍並聽四川宣撫司節制郭
浩為鄜延經畧使同節制陝西軍馬秋七月甲申以文
臣為新復諸縣令丙戌東京耆老李茂松寇璋等二百
人奉表稱賀丁亥金人拘王倫于中山八月丙辰金國
以達蘭主和割地殺之壬戌蠲成都潼川路歲輸對糴

等米及水運錢乙丑給新法度牒紫衣師號錢付陝西
市軍儲庚午遣蘇符等使金賀正旦九月己卯命鄜延
秦鳳熙河路招納蕃部熟戶及陷沒夏國軍民丙戌封
叔士儂為齊安郡王冬十月王倫遣其副監公佐先歸
己未蠲階成岷鳳四州民稅之半十一月癸未嗣濮王
仲儻薨十二月甲子李光罷

十年春正月丙戌遣莫將等充迎護梓宮奉迎兩宮使
辛卯李綱薨二月辛亥以劉錡為東京副留守李顯忠

為南京副留守丁卯以孟庾知開封府為東京留守仇
愆知河南府西京留守三月丙申蘇符自東京還丁酉
命川陝宣撫司軍事不及待報者聽隨宜措置己亥以
郭浩知永興軍兼節制陝西諸路軍馬楊政徙知興元
府是月命胡世將與夏人議入貢夏人不報夏四月壬
申韓肖胄罷五月己卯金烏珠等分四道來攻乙酉烏
珠入東京留守孟庾以城降知興仁府李師雄知淮寧
府李正民及河南諸州繼降丙戌金人破拱州守臣王

慥死之薩里罕自河中趨永興軍陝西州縣皆降丁亥
金人破南京留守路允迪降己丑金人破西京留守李
利用棄城走癸己知亳州王彥先叛降于金金人破永
興軍趨鳳翔己亥命劉光世為三京招撫處置使庚子
以吳璘同節制陝西諸路軍馬聽胡世將便宜黜陟處
置軍事辛丑金人攻鳳翔府之石壁砦吳璘遺統制姚
仲等拒卻之金人圍耀州郭浩救之金兵解去壬寅金
人圍順昌府三路都統葛王裒以大軍繼至劉錡力戰

却之六月甲辰以韓世忠張俊岳飛並兼河南北諸路
招討使乙巳劉錡遣將闞充擊金人于順昌之李村丁
未罷建康府行宮營繕戊申以劉錡為沿海制置使己
酉吳璘克扶風壬子烏珠帥孔彥舟鄺瓊趙榮等攻順
昌府劉錡率將士力戰敗之乙卯烏珠還以知平江府
梁汝嘉兼浙西沿海制置使丙辰岳飛將牛皋擊金人
于京西己未郭浩復醴州壬戌詔諸司錢物量留經費
外悉發以贍軍樓炤以父喪去位甲子薩里罕攻青谿

嶺鄜延經略使王彥擊之薩里罕還屯鳳翔命士儂主
奉濮王祠事遣司農少卿李若虛詣岳飛軍諭指班師
飛不聽庚午以劉錡為武泰軍節度使侍衛馬軍都虞
候是月金人圍慶陽府岳飛與金人戰于蔡州遂復蔡
州閏月癸酉張俊遣統制宋超擊金兵于永城縣甲戌
削孟庾路允迪官金人攻涇州守臣曲汲棄城去經略
使田晟救涇州甲申晟及金人再戰于涇州金人引歸
鳳翔乙酉降陝西雜犯死罪以下丙戌以胡世將為端

明殿學士吳璘為鎮西節度使楊政武當節度使郭浩
奉國節度使王德攻金人于宿州降其守馬秦丁亥釋
順昌府流以下囚再復祖二年己丑永興軍鈐轄傅忠
信擊金人于華陰壬辰岳飛遣統制張憲擊金將韓常
于潁昌府遂復潁昌府丙申復淮寧府丁酉趙鼎分司
興化軍居住岳飛遣統制郝晟等與金人戰于鄭州北
復鄭州李興復汝州進復伊陽等八縣李成遁去韓世
忠遣統制王勝王權攻海州克之戊戌張俊率統制宋

紹等及王德兵會于城父縣遂復亳州己亥金人救海

州王權等逆擊之復懷仁縣

宋史懷仁作懷二據九域志改

庚子張俊

棄亳州還壽春再貶趙鼎漳州居住又貶清遠軍節度

副使潮州安置秋七月癸卯岳飛遣張應韓清入西京

會李興復永安軍丙午以御史中丞王次翁參知政事

己酉岳飛及烏珠戰于郾城縣庚戌曲赦海州永興軍

統領辛鎮及金人戰于長安城下癸丑以楊沂中為淮

北宣撫副使劉錡為判官甲寅岳飛遣統制楊再興王

蘭等擊金人于小商橋死之乙卯金人攻潁昌岳飛遣
王貴姚政合兵擊敗之壬戌飛自郾城還軍軍潰潁昌
蔡鄭諸州皆復為金有乙丑增收州縣頭子錢為激賞
費金人圍淮寧府趙秉淵棄城走辛未金人攻盩厔縣
王俊逆戰于東洛谷卻之八月壬申黜張九成喻樛陳
剛中凌景夏樊光遠毛叔度元盥等七人乙亥韓世忠
圍淮陽軍不克庚辰韓世忠龍覲瓊等軍于千秋湖陵
破之壬午李成犯西京李興擊卻之丁亥楊沂中自宿

州夜襲柳子鎮軍潰金人屠宿州甲午川陝宣撫司統領王喜等擊金人于汧陽縣九月壬寅遣起居舍人李易諭韓世忠罷兵諸大帥皆還鎮丁未楊政遣統制楊從儀夜襲金人于鳳翔府戊申金人復入西京李興棄城去庚戌合祀天地于明堂大赦戊辰以郭浩知金州節制陝西河東軍馬兼措置河東忠義軍是秋知代州王忠植復石代等十一州冬十月癸酉復張浚觀文殿大學士甲戌以王忠植為建寧軍承宣使河東路經略

安撫使庚辰金人攻慶陽府守臣宋萬年以城降辛卯
金人攻陝州吳琦擊却之庚子金人襲洮州攻鐵城堡
統制孔文清惠逢擊却之是月胡世將命王忠植救慶
陽叛將趙惟清執之降于金忠植死之十一月丁未金
將喀齊喀復攻陝州吳琦擊却之又攻寶雞縣鳳翔統
制楊從儀却之壬子以令憲為保寧軍節度使

十一年春正月癸卯楊從儀擊金人于渭南丁巳金人
破壽春府庚申金人渡淮丙寅金人破廬州戊辰又破

商州二月癸酉張俊遣王德渡江屯和州金人退屯昭
關知商州邵隆復商州乙亥金人復來爭和州張俊拒
之命韓世忠以兵援淮西丙子趣岳飛會兵斬黃王德
等擊金人于含山縣東己卯統制闕師古李橫復巢縣
癸未王德田師中等復含山縣奪昭關劉錡自東關擊
金人于青谿甲申李顯忠遣統領崔阜擊金人于舒城
丁亥楊沂中劉錡等敗烏珠軍于柘臯己丑烏珠親率
兵逆戰于店步沂中等又敗之遂復廬州是月虔吉州

盜賊悉平三月癸卯復張俊特進金人圍濠州甲辰張
俊楊沂中劉錡議班師丙午釋淮西雜犯死罪以下丁
未金人破濠州鈐轄邵青死之戊申張俊遣楊沂中王
德入濠州遇金伏兵敗還己酉韓世忠至濠州不利而
退辛亥岳飛次定遠縣還屯舒州楊沂中歸行在壬子
金人渡淮北歸癸丑張俊歸建康府丁巳劉錡歸太平
州甲子行營統制張彥及金人遇于汴陽之劉坊砦第
八將張宏戰沒夏四月己卯孫近罷辛巳以王次翁兼

權同知樞密院事韓世忠張俊岳飛相繼入覲壬辰以世忠俊並為樞密使飛樞密副使乙未張浚請以所部兵隸御前罷三宣撫司改統制官為御前統制官各屯駐舊所丙申以廣西經略使胡舜陟節制廣東湖南兵趣討駱科慕容洵破新泉砦又攻會州將官朱勇破之五月丁未遣張俊岳飛于楚州巡視邊防召劉光世赴行在庚申加楊沂中檢校少保開府儀同三司六月乙亥加秦檜特進尚書左僕射同中書門下平章事兼樞密

使乙丑明州僧王法恩等謀反伏誅壬辰劉光世罷為
萬壽觀使秋七月庚子以翰林學士范同參知政事以
旱減膳祈禱遣官決滯獄出繫囚丁未加秦檜少保甲
寅罷劉錡兵命知荆南府己未加張俊太傅是月命張
俊復如鎮江措置軍務留岳飛行在八月戊辰立祚德
廟于臨安祀韓厥

謹按通鑑輯覽

命批
元聖祖之于肩衰亦猶唐之于李耳然李耳猶謬藉其有元
足炫且是時兩宮未還陵寢未復顧沾沾于祚德
之廟以為追遠報功其所以為榮即所以取辱耳

甲戌罷

岳飛癸巳胡世將起復九月鄂州前軍副統制王俊告副都統制張憲謀叛張俊收憲屬吏以聞辛亥吳璘拔秦州壬子璘率姚仲及金人戰于丁劉園楊政克隴州破岐下諸屯郭浩復華州入陝州丙申以劉光遠等充金國通問使吳璘及金人戰于剡家灣大敗之遂圍臘家城癸亥璘自臘家城受詔班師楊政郭浩皆引軍還乙丑邵隆復號州郝晟禽駱科斬之冬十月丙寅金人破泗州遂破楚州戊辰楊政及金人戰于寶雞縣敗之

乙亥金烏珠遣劉光遠等還戊寅下岳飛張憲大理獄
壬午遣魏良臣王公亮為金國稟議使乙酉虛恨蠻主
歷階詣嘉州降癸巳韓世忠罷為醴泉觀使封福國公
是月金人破濠州即隆復陝州十一月己亥范同罷責
李光為建寧軍節度副使滕州安置辛丑金烏珠遣審
議使蕭毅邢其瞻與魏良臣等偕來丁未范同分司筠
州居住壬子蕭毅等入見始定議和盟誓乙卯以何鑄
簽書樞密院事充金國報謝進誓表使庚申遣官告祭

天地宗廟社稷辛酉以張浚為檢校少傅崇信軍節度使萬壽觀使是月與金國定和立盟書約以淮水中流為界割唐鄧二州畀之歲奉銀二十五萬兩絹二十五萬匹詔川陝宣撫司毋出兵生事招納叛亡十二月丁卯責降徽猷閣待制劉洪道為濠州團練副使柳州安置乙亥烏珠遣何鑄等如會寧見金主且趣割陝西餘地遂命周聿莫將鄭剛中分畫京西唐鄧陝西地界癸巳賜岳飛死于大理寺斬其子雲及張憲于市家屬徙

廣南官屬于鵬等論罪有差

十二年春正月癸卯罷樞密行府庚申責孫近分司漳
州居住二月丁丑加建國公瑗檢校少保進封普安郡
王己卯賜楊沂中名存中辛卯蠲廣南東西路駱科所
擾州縣今年租癸巳金主許歸梓宮及皇太后遣何鑄
等還夏四月甲子以孟忠厚為迎護梓宮禮儀使王次
翁為奉迎兩宮禮儀使丁卯皇太后偕梓宮發五國城
辛巳皇后邢氏崩訃初至五月甲午以鄭剛中為川陝

宣撫副使乙未遣審詔遠等賀金主生辰置淮西京西
陝西諸路權場六月甲子命侍從臺諫禮官雜議權奉
攢宮戊辰以万俟卨為攢宮按行使辛未責王庶為嚮
德軍節度副使道州安置壬午金人歸孟庾李正民甲
申以吳璘為檢校少師階成岷鳳四州經略使秋七月
壬辰福州簽判胡銓除名新州編管己亥以何鑄兼權
參知政事乙卯蠲廣南湖北沿邊州軍免行錢八月辛
酉烏珠使來求商州及和尚方山二原丙寅向鑄罷甲

戊以万俟卨參知政事充金國報謝使壬午皇太后至
己丑徽宗及顯肅懿節二后梓宮至是月鄭剛中畫陝
西地界割商秦之半畀金存上津豐陽天水三縣及隴
西成紀餘地棄和尚方山二原以大散關為界九月乙
未以孟忠厚為樞密使充攢宮總護使壬寅大赦乙巳
加秦檜太師封魏國公丙午金使劉筭完顏宗表等九
人入見戊申以王次翁等充金國報謝使藏金國誓書
于內侍省辛亥加張中孚開府儀同三司中彥清海軍

節度使甲寅杖殺偽福國長公主李善靜以金州郭浩為金房開達四州經略安撫使遣楊愿使于金賀正旦冬十月乙丑始聽中外用樂丙寅權攢徽宗皇帝及顯肅皇后于會稽永固陵懿節皇后祔乙亥以翰林學士陳克俊簽書樞密院事權參知政事丁丑以皇太后回鑿推恩進封秦檜為秦魏兩國公辭不拜庚辰責御史中丞何鑄為祕書少監徽州居住甲申皇太后生辰上壽于慈寧宮十一月癸巳樞密使張浚罷進封清河郡

王乙未加楊存中少保辛丑劉光世薨十二月癸酉以李顯忠為保信軍節度使御前選鋒軍統制王進為御前諸軍都統制

十三年春二月乙亥蠲雷化等十州免行錢丙子造金象革木四輅庚辰立太學及科舉試法乙酉建景靈宮奉安累朝神御三月己亥造鹵簿儀仗乙巳建社稷壇丙午築園丘振淮南饑民仍禁暹糴夏四月癸亥頒鄉飲酒儀于郡國閏月己丑立貴妃吳氏為皇后庚戌楊

政加檢校少保壬子蠲諸路無名月椿錢乙卯王次翁
罷五月甲子責張九成南安軍居住六月壬寅程克俊
罷以万俟卨兼權簽書樞密院事庚戌金遣洪皓張邵
朱弁來歸秋七月甲子詔求遺書丙寅處州卒楊興等
謀亂伏誅壬申蠲浙西貧民逋負丁鹽錢八月丙戌遣
吏部侍郎江遛奉迎累朝神御于温州己亥遣鄭朴等
使金賀正旦王師心等賀金主生辰九月戊寅蠲淮南
逋欠坊場錢及上供帛冬十月庚寅製渾天儀乙未奉

安累朝帝后神御于景靈宮十一月庚申日南至合祀
天地于圜丘太祖太宗並配大赦十二月癸未朔日食
不見癸巳建秘書省丁酉增太學弟子員二百己酉金
遣完顏暉等來賀明年正旦是月始頒來歲歷于諸路
監司守臣

十四年春正月丁巳遣羅汝楫等報謝于金二月癸巳
蠲江浙諸路逋欠錢帛丙午万俟卨罷己酉以資政殿
學士樓炤簽書樞密院事兼權參知政事加郭浩檢校

少保三月乙卯蠲江浙京湖積欠上供錢米丁卯避金
太祖嫌名改岷州為西和州己巳如太學蠲汀漳泉建
四州經賊所擾民賦役一年壬申解潛責授濠州團練
副使南安軍安置己卯詔舉賢良夏四月甲申詔刑部
及監司決滯訟丁亥初禁野史甲午金人來求淮北人
之在南者詔願還者聽五月甲子樓炤罷乙丑以御史
中丞李文會簽書樞密院事兼權參知政事己巳金始
遣烏雅和等來賀天申節六月甲申蠲江浙州縣酒稅

坊場網運倉庫積年逋負孫近再奪三官移南安軍居
住丁亥加高世則少保乙未振江浙福建被水民庚子
奪万俟卨三官歸州居住秋七月戊午金人殺王倫于
河間府八月乙未遣林保使金賀正旦宋之才賀金主
生辰九月辛酉以吳璘為利州西路安撫使楊政利州
東路安撫使壬申趙鼎移吉陽軍安置癸酉命臨安府
索蔡京子孫逮赴貶所遇赦永不量移冬十月甲午黜
伊川程氏之學乙未加韋淵少師己亥永蠲永道柳三

州桂陽監及茶陵縣民身丁錢絹米麥十一月癸酉李
光移瓊州安置乙亥朱勝非薨十二月丁酉李文會罷
尋責筠州居住庚子以御史中丞楊愿簽書樞密院事
兼權參知政事癸卯金遣布薩溫等來賀明年正旦是
月汀賊華齊寇漳州長泰縣安撫司遣兵討之為所敗
將佐趙成等死之是歲四川宣撫司始取民戶稱提錢
歲四十萬緡以備軍費

十五年春正月丁未朔御大慶殿初行大朝會禮辛酉

初置籍田夏四月丙丁賜秦檜第一區癸未以星變避
殺減膳命監司郡守條上便民事宜提刑巡行決獄丁
亥大赦五月甲子金遣完顏宗尹等來賀天申節六月
乙亥朔日有食之乙酉加秦檜妻婦子孫官封秋七月
蠲廬光二州上供錢米一年丁卯免汀漳二州秋稅及
處州三縣被水民紬絹鄂州舊額絹各一年己巳蠲四
川轉運司積貸常平錢八月甲戌禁收折帛令零錢止
輸實數乙亥蠲京西路請佃田租及州縣場務稅二年

九月辛酉遣錢周林使金賀正旦嚴抑賀金主生辰冬
十月乙亥帝書一德格天之閣賜秦檜仍就第賜宴丙
子楊愿罷癸未以樞密都承旨李若谷簽書樞密院事
兼權參知政事武岡軍徭人楊再興降庚寅以翰林學
士承旨秦熈為資政殿學士提舉萬壽觀兼侍讀恩數
視執政癸巳蠲安豐軍上供錢米二年甲午以汪勃言
折彥質黨趙鼎柳州安置辛丑命秦熈班簽書樞密之
下十一月丙辰郭浩卒丙寅全給秦檜歲賜公使錢萬

緒十二月丁卯金遣富察說等來賀明年正旦

十六年春正月戊子增太學外舍生額至千人壬辰親
饗先農于東郊行耜田禮二月辛丑割金州豐陽縣洋
州乾祐縣畀金人癸丑建秦檜家廟三月辛卯造秦檜
家廟祭器乙未增建太廟夏四月壬子禁州縣預借民
稅及和買錢五月丁亥金遣烏庫哩海等來賀天申節
秋七月壬申張浚落節鉞連州居住壬辰立秘書省獻
書賞格八月壬子遣邊知白使金賀正旦周執羔賀金

主生辰九月甲戌命端明殿學士何鑄等為金國祈請
使請國族冬十一月丙子合祀天地于圜丘大赦庚辰
罷州縣新勅稅場十二月辛酉金遣盧彥倫等來賀明
年正旦

十七年春正月己巳命諸路收試中原流寓士人已卯
禁監司郡守進羨餘壬辰以李若谷參知政事御史中
丞何若簽書樞密院事癸巳進秦熺為資政殿大學士
二月辛酉李若谷罷三月乙亥何若罷己卯以翰林學

士段拂參知政事乙酉改封秦檜為益國公戊子改命
張俊為靜江寧武靖海軍節度使韓世忠鎮南武安寧
國軍節度使落李若谷資政殿學士江州居住夏四月
丙申蠲諸路免行錢三之一己亥以御史中丞汪勃簽
書樞密院事己未詔趙鼎遇赦永不檢舉五月甲子詔
舉賢良己巳洪皓責濠州團練副使英州安置辛巳金
遣完顏卞等來賀天申節六月戊午改命普安郡王瑗
為常德軍節度使恩平郡王璩武康軍節度使秋七月

辛巳以徽猷閣待制知成都府李璆權四川宣撫使戊子以吳璘克御前諸軍都統制兼知興州八月癸卯趙鼎薨于吉陽軍戊申遣沈該使金賀正旦詹大方賀金主生辰九月己巳減四川科率虛額錢乙亥蠲江南東西道諸州月椿錢丙子鄭剛中罷丙戌減江浙諸州折帛錢冬十月辛卯朔日有食之己酉進楊存中為少傅十二月甲寅鄭剛中落職桂陽監居住丙辰金遣完顏宗蕃等來賀明年正旦

十八年春正月己巳如天竺寺遂如玉津園二月乙未
段拂罷尋落職興國軍居住以汪勃兼權參知政事辛
亥聽趙鼎歸葬三月戊寅罷汀州諸縣上供銀蠲茶鉛
本錢之半壬午以秦熺知樞密院事乙酉禁民私渡淮
及招納叛亡夏四月戊子朔日有食之庚子秦熺乞避
父子共政以為觀文殿學士提舉萬壽觀兼侍讀提舉
秘書省壬寅命熺恩禮視宰臣班次亞右僕射五月丙
子金遣蕭秉溫等來賀天申節癸未李顯忠降平海軍

承宣使台州居住甲申以李璆為四川安撫制置使秋
八月丙申汪勃罷丁酉以工部尚書詹大方簽書樞密
院事兼權參知政事禁州縣士民飾詞舉留官吏閏月
庚申免江浙湖南今歲和糴壬申遣王墨卿使金賀正
旦陳誠之賀金主生辰甲申辛道宗降官房州羈管九
月丙午詹大方薨冬十月丙辰以御史中丞余堯弼簽
書樞密院事兼權參知政事十一月己亥胡銓移吉陽
軍編管壬寅鄭剛中責濠州團練副使復州安置辛亥

振紹興府饑十二月乙卯振明越秀潤徽婺饒信諸州
流民丙寅借給被災農民春耕費丁卯命利路三都統
措置營田以其租克減免對糴之數戊辰蠲被災下戶
積欠租庚辰金遣召守忠等來賀明年正旦

十九年春正月癸卯如天竺寺遂如玉津園三月癸未
朔日有食之甲辰鄭剛中移封州安置夏四月丙寅秘
閣修撰張邵上秦檜在金代徽宗與納罕書藁詔付史
館以邵為徽猷閣待制五月壬午蠲汀漳泉三州被賊

所擾民田二稅庚子金遣唐古德溫等來賀天申節丁未減連英循惠新恩六州免行錢六月丁巳停茶陵縣丞王庭珪官辰州編管秋九月戊申命繪秦檜像仍作贊賜之冬十月己未湖南副總管辛永宗停官肇慶府編管十一月壬辰合祀天地于園丘大赦十二月丁巳金岐王亮殺其主亶自立己未詔無子女戶得解舉人太學生之獨居者並免役丁丑金遣完顏究等來賀明年正旦

二十年春正月壬辰礫殿前司軍士施全于市二月庚戌蜀靜江府昭州上供折布錢三之一庚申免海外四州及瀘叙二州長寧軍經界三月庚辰金遣完顏思恭等來報即位癸未以余克弼參知政事給事中巫伋簽書樞密院事丙戌遣堯弼等賀金主即位戊子以秦熺為觀文殿大學士萬壽觀使丙申詔李光遇赦永不檢舉編管胡寅程瑀潘良貴張燾等庚子以巫伋兼權參知政事壬寅胡寅責果州團練副使新州安置夏四月

壬子以没入官田悉歸常平司禁募民佃種癸酉置力
田科募江浙福建民耕兩淮閒田是月信州妖賊黃曾
等作亂陷貴溪縣江西兵馬鈐轄李橫等討平之五月
癸未秦檜上中興聖統甲午金就遣完顏思恭等來賀
天申節六月癸亥加秦熺少保秋八月甲辰量移張浚
永州孫近虔州万俟卨沅州李若谷饒州李文會江州
段拂南康軍並居住辛酉遣陳誠之使金賀正旦王曦
賀金主生辰冬十月秦檜有疾庚午命執政赴檜第議

事十一月甲子檜始朝命肩輿入宮門二孫扶掖升殿
不拜己巳金遣蕭頤等來賀明年正旦

二十一年春正月癸未以兩淮民復業未久寬其租庚
子蠲平江府折帛錢三年二月壬戌遣巫伋等為金國
祈請使請歸淵聖皇帝及皇族癸亥以余堯弼兼簽書
樞密院事三月丁亥蠲江浙荆湖等路中戶以下積年
逋負夏五月戊午金遣劉長言等來賀天申節以吳璘
楊政田師中並為太尉秋七月壬寅以集英殿修撰知

衢州曹筠為四川安撫制置使辛亥罷柴米稅八月壬申韓世忠薨詔進太師癸酉追封通義郡王乙亥加岳陽軍節度使士樽開府儀同三司充萬壽觀使甲申遣陳夔使金賀正旦陳相賀金主生辰九月巫伋使還所請皆不許冬十月壬午進張俊為太師十一月庚戌余克弼罷丁巳進義副尉劉允中坐指斥謗訕棄市十二月癸巳金遣富珠哩定方等來賀明年正旦

二十二年春三月丁酉以王庶二子之奇之荀謗毀朝

政並除名之竒梅州之荀容州編管甲辰以直龍圖閣
葉三省監都作院王遠通書趙鼎王庶力詆和議言涉
謗訕三省落職筠州居住遠除名高州編管夏四月丙
子巫伋罷辛巳以御史中丞章復簽書樞密院事兼權
參知政事五月癸丑金遣田秀穎等來賀天申節秋七
月丁巳虔州軍卒齊述殺殿前司統制吳進江西同統
領馬晟據州叛八月己卯遣鄂州都統制田師中發兵
回江西安撫使張澄殿前司遊奕軍統制李耕討述九

月乙未又遣左翼軍統制陳敏相繼討之癸丑章復罷
冬十月甲戌以御史中丞宋樸簽書樞密院事兼權參
知政事就命李耕知虔州十一月戊申合祀天地于園
丘大赦丁巳李耕入虔州盡誅叛兵虔州平十二月辛酉
朔減夔州路及蒲江清井兩監鹽錢戊子金遣張利用
等來賀明年正旦

二十三年春正月癸卯進韋淵太傅己酉復以李顯忠
為寧國軍節度使二月癸亥如玉津園遂至延祥觀庚

午鬱虔州軍賊黃明等八人于都市三月丙午齊安郡
王士儂薨于建州是春金主亮徙都燕京夏五月乙巳
復以蕭振為四川制置使辛亥金遣赫舍哩大雅等來
賀天申節秋七月戊戌命合州取綦崇濃草秦檜罷相
制所受墨敕八月乙丑士樽薨己卯賜秦檜建康府永
豐圩田九月甲午振潼川被水州縣仍蠲其賦冬十月
戊午遣吳巢使金賀正旦施鉅賀金主生辰戊辰宋樸
罷壬申以右諫議大夫史才簽書樞密院事兼權參知

政事十二月癸亥韋淵薨庚戌金遣蔡松年等來賀明年正旦

二十四年春正月辛未如延祥觀二月丙午加吳益太尉三月壬申楊再興復寇邊前軍統制李道討平之夏五月癸丑朔日有食之衢州民兪八作亂圍州城通判州事汪召錫拒卻之遂掠嚴州壽昌縣遣殿前司正將辛立討平之辛未金遣耶律安禮等來賀天申節六月癸巳史才罷甲午以御史中丞魏師遜簽書樞密院事

兼權參知政事以主管侍衛馬軍司成闕為慶遠軍節
度使秋七月癸丑張俊薨壬戌捐四川茶馬司羨餘錢
給軍費甲子復落蕭振職池州居住乙丑以總領財賦
符行中為四川制置使乙亥南丹州莫公晟及宜州界
外諸蠻納土內附八月甲午罷溫州市黃柑福州貢荔
枝冬十月壬午蠲旱傷州縣租戊子遣沈虛中使金賀
正旦張士襄賀金主生辰十一月乙丑魏師遜罷丁卯
以權吏部侍郎施鉅參知政事鄭仲熊簽書樞密院事

戊辰進秦熹少傅封嘉國公是月以通判武岡軍方時
通書胡銓除名永州編管十二月乙巳金遣白彥恭等
來賀明年正旦

二十五年春二月乙酉以鎮江都統制劉寶為安慶軍
節度使建康都統制王權為清遠軍節度使壬寅以通
判常州沈長卿仁和縣尉芮煜作詩譏訕除名長卿化
州煜武岡軍編管夏四月乙酉施鉅罷以鄭仲熊兼權
參知政事己亥減廣西路折米錢五月丁未朔日有食

之戊申減諸路免行錢癸丑前知泉州宗室令衿坐交
結罪人汀州居住乙丑金遣李通等來賀天申節六月
庚辰鄭仲熊罷辛巳以禮部侍郎湯思退簽書樞密院
事兼權參知政事癸卯以言者追譖岳飛改岳州為純
州岳陽軍為華容軍秋七月丙辰減四川絹估稅斛鹽
酒等錢蠲州縣積欠詔四川營田有占民田者常平司
按驗給還甲戌封李天祚為南平王八月丁丑申嚴誣
告加等法丙戌以吏部侍郎董德元參知政事蠲諸路

身丁免丁錢一年冬十月壬午遣王岷使金賀正旦鄭
柟賀金主生辰丙申進封秦檜建康郡王煇為少師並
致仕以湯思退兼權參知政事是夕檜薨丁酉檜姻黨
戶部侍郎兼知臨安府曹泳停官新州安置朱敦儒薛
仲邕王彥博杜思旦皆罷辛丑徙殿中侍御史徐誥右
政言張扶皆出為他官十一月壬子以敷文閣直學士
魏良臣參知政事癸亥合祀天地于圜丘大赦乙丑復
洪皓官釋張祈獄封叔和州防禦使右監門衛大將軍

士儻為崇慶軍節度使嗣濮王福建路提刑令諤為利
州觀察使安定郡王十二月甲戌詔張浚折彥質万俟
卨段拂聽自便量移李光柳州安置乙亥復以高為資
政殿學士提舉萬壽觀兼侍讀戊寅鄭億年青建武軍
節度副使南安軍安置甲申召孟忠厚奉朝請命胡寅
張九成等二十八人並令自便仍復其官乙酉董德元
罷丙戌以劉錡知潭州甲午以敷文閣待制沈該參知
政事丙申復以蕭振為四川制置使復張浚折彥質趙

汾葉三省王趯劉岑官移胡銓衡州己亥金遣耶律歸
一等來賀明年正旦

二十六年春正月壬子省諸州稅場以寬商賈甲子追
復趙鼎孫近鄭剛中汪藻舊職丙寅曹泳吉陽軍編管
封伯令衿明州觀察使安定郡王戊辰除民事律蠲諸
路積負及黃河竹索錢二月庚辰罷進奏院定本朝報
乙酉進士林東英州編管右朝奉郎林一飛責監高州
鹽稅辛卯魏良臣罷三月甲寅以邊事己定罷宰相兼

領樞密使丁巳詔兩淮邊民未復業者復其租十年已
未以万俟卨參知政事癸亥加吳璘開府儀同三司乙
丑以東平府進士梁勛伏闕上書言北事送千里外州
軍編管丙寅詔曰講和之策斷自朕志秦檜但能贊朕
而已豈以其存亡而渝定議耶近者無知之輩鼓倡浮
言以惑衆聽至有偽撰詔命召用舊臣抗章公車妄議
邊事朕甚駭之自今有此當重寘典憲丁卯蠲閩浙諸
州歲供軍器所物料三之一減諸州工匠已募四川

民佃淮南京西閒田並邊復租十年次邊五年夏四月
庚寅遣陳誠之等賀金主尊號禮成五月壬寅以沈該
為尚書左僕射万俟卨為右僕射並同中書門下平章
事湯思退知樞密院事丙辰蠲楚州盱眙軍民租十年
己未金遣敬嗣暉等來賀天申節六月丁丑以端明殿
學士程克俊參知政事辛卯命史館重修日歷秋七月
壬寅蠲諸路丁絹一年丙午右奉議郎薛仲邕連州編
管丁未以星變避殿減膳八月己丑蠲建康府積欠內

帑錢帛辛卯程克俊罷甲午以吏部侍郎張綱參知政
事九月乙巳以翰林學士陳誠之同知樞密院事冬十
月己巳詔許秦檜在位之日無辜被罪者自陳釐正甲
午蠲柳道永三州桂陽軍民身丁米乙未王會移瓊州
編管宋貺責梅州安置丁酉以張浚上書論用兵依舊
永州居住辛丑遣李琳使金賀正旦葛立方賀金主生
辰閏月丙午罷廉州貢珠縱蛋丁自便己酉命離軍人
願歸農者人給江淮湖廣荒田百畝復其租稅十年十

二月甲子金遣梁鉞等來賀明年正旦

二十七年春正月乙酉如延祥觀二月庚子楊政卒戊
午以御史中丞湯鵬舉參知政事癸亥加劉錡太尉三
月丁亥詔焚交趾所貢翠羽于通衢仍禁宮人服用銷
金翠羽己丑減三川對糴米夔路激賞絹兩川絹估及
茶司引息虛額錢辛卯万俟卨卒甲午除耕牛稅五月
癸未金遣耶律守素等來賀天申節六月戊申以湯思
退為尚書右僕射同中書門下平章事庚戌復余深黃

潛善並觀文殿大學士秋七月乙亥以龍圖閣學士李
文會為四川安撫制置使八月乙未以湯鵬舉知樞密
院事九月癸酉張綱罷戊寅以吏部尚書陳康伯參知
政事蠲淮南京西湖北積欠內藏錢帛冬十一月癸亥
朔減福建鹽鈔錢乙丑遣孫道夫使金賀正旦辛巳遣
劉章賀金主生辰丁亥湯鵬舉罷戊子蠲廬州二稅及
上供錢米一年十二月甲午詔廣南經畧市舶司察蕃
商假託入貢戊午金遣高思廉等來賀明年正旦

二十八年春正月己卯如延祥觀遂至玉津園壬午禁
諸路二稅折納增價癸未遣戶部郎中莫濛等檢視淮
南浙西江東沙田蘆場二月丙申以陳誠之知樞密院
乙巳以工部侍郎王綸同知樞密院事三月辛酉朔日
有食之戊子責秦檜黨宋樸徽州居住沈虛中筠州居
住夏四月辛亥嚴州遂安賊江大明寇衢州官軍捕斬
之五月金遣蕭恭等來賀天申節六月甲寅增浙西江
東淮東沙田蘆場租課秋七月庚申立江西上供米綱

賞格乙酉復鬻沒官田八月己丑檢放風水災傷州縣
苗稅仍振貸饑民九月庚辰以中書舍人王剛中為四
川安撫制置使辛巳封叔建州觀察使士鞞為昭化軍
節度使嗣濮王癸未蠲平江紹興湖州被水民逋賦冬
十月丁亥朔遣沈介使金賀正旦黃中賀金主生辰十
一月己卯合祀天地于園丘大赦十二月庚寅安定郡
王令衿薨丁未復李光官放自便戊申蠲楚州歸附民
賦役五年壬子金遣蘇保衡等來賀明年正旦

二十九年春二月丙辰朔以皇太后年八十詣慈寧殿
行慶壽禮庚申濬平江二十六浦庚午振湖秀諸州饑
民癸酉如延祥觀遂至玉津園庚辰禁諸州科賣倉鹽
癸未蠲沙田蘆場為風水所侵者租之半是月金國罷
沿邊權場惟泗州如舊二月丙戌亦罷沿邊權場存其
在盱眙者加吳璘少保己丑禁海商假託風潮私往北
界壬辰除臨安府歲供修的司錢丁酉蠲四川折估糴
本積欠錢甲寅取具貶死臣僚姓名議加恩典三月丙

子除州縣積欠錢及中下戶所欠官錢物丁丑詔侍從
臺諫帥臣監司歲舉可任將帥者二人限命官子孫制
田減父祖之半己卯除湖州平江紹興流民公私逋負
夏四月壬辰國子司業黃中自金使還言金人將徙居
汴京五月甲寅罷鬻福建閃生沙田金遣王可道等來
賀天申節六月甲辰遣王綸等為金國奉表稱謝使丁
亥禁江淮私渡北人丙申陳誠之罷己亥以陳康伯兼
權樞密院事辛丑李光卒壬寅以主管步軍司趙密為

太尉己酉沈該罷閏月丁巳命江湖浙西五漕司增價
糴米赴沿江十郡自荆至常州以備振貸己未罷江浙
淮東沙田蘆場所增租課甲子落沈該觀文殿大學士
致仕罷福建安撫司官賣鹽秋七月丁亥以權吏部尚
書賀允中參知政事癸巳封權戶部侍郎令諤為安定
郡王己酉禁諸路抑買官田八月甲子募化人輸米行
在諸倉願以茶鹽礬鈔等償直者聽丁卯除南雄英連
三州經界復丁米舊額九月乙酉王綸使還入見言金

國和好無他宰相湯思退等稱賀甲午以湯思退為尚
書左僕射陳康伯為右僕射並同中書門下平章事乙
未以皇太后不豫太赦丙申為太后祈福蠲中下戶所
欠稅賦及江浙蝗潦州縣租丁酉減僧道免丁錢己亥
蠲見監贓罰賞錢庚子皇太后韋氏崩癸卯遣周麟之
等為金國奉表哀謝使冬十一月丁亥遣賀允中等為
金國遺留國信使丙午權攢顯仁皇后于永祐陵十二月
辛未以王綸知樞密院事壬申減三省樞密院激賞庫

及諸書局歲用錢鼎州程昌寓所增蔡州官兵衣糧錢
四之一西和州官賣鹽直之半蔣州上供經總制司無
額錢如之丙子金遣施宜生等來賀明年正旦

三十年春正月丙申以吏部侍郎葉義問同知樞密院
事丁酉罷鈞容班樂工及甲庫酒局壬寅募人墾淮南
荒田二月甲寅罷夔州路權茶乙卯金遣大懷忠等來
弔祭戊午遣葉義問為金國報謝使癸酉立普安郡王
璦為皇子更名瑋丙子進封建王三月辛巳免湖北京

西宣撫司諸庫未輸錢癸未以淮東茶鹽司錢充募民
墾田費乙酉加吳益少保趙密開府儀同三司丙午加
恩平郡王璩開府儀同三司判大宗正事始稱皇姪夏
四月己酉以孫愔為蘄州防禦使愔貴州團練使惇榮
州刺史丙辰以賀允中兼權同知樞密院事五月丙申
金遣蕭榮等來賀天申節壬寅落沈該致仕復觀文殿
大學士知明州丙午加吳益太尉六月庚午王綸罷辛
未以江西廣東湖南折帛經總制錢及江西米充江州

欽定四庫全書

欽定續通志
卷三十五

三

軍費秋七月戊戌以葉義問知樞密院翰林學士周麟
之同知院事御史中丞朱倬參知政事八月丙子朔日
有食之壬子賀允中使還言金人必叛盟宜為之備癸
丑允中致仕甲寅復以四川經總制錢給總領所增招
兵士壬申淮東總管許世安奏金主亮至汴京起重兵
五十餘萬屯宿州泗州謀南下九月庚寅以帶御器械李
寶為浙西副總管提督海船駐平江冬十月丁未遣虞
允文使金賀正旦徐度賀金主生辰壬戌以劉錡為鎮

江都統制荆南右軍統制李道為都統制癸酉蠲舒和
蘄黃四州民附種田租十一月庚辰禁諸路折輸職田
錢十二月乙巳湯思退罷初行會子于東南海南黎賊
王文滿平癸丑命戶部立經總制錢十年中數為定額
丁卯金遣布薩權等來賀明年正旦

三十一年春正月甲戌朔日有食之丁亥免湖州增丁
所輸絹壬辰劉寶落節鉞福建路居住己亥放張浚胡
銓自便二月甲寅罷楊存中殿前都指揮使進太傅為

醴泉觀使封同安郡王辛未秦熺卒三月壬午以兵部尚書楊椿參知政事丁亥奪秦熺贈官及遺表恩賞庚寅以陳康伯為尚書左僕射朱倬右僕射並同中書門下平章事夏四月丁巳以久雨傷蠶麥盜賊間發命侍從臺諫條上弭災除盜之策出天申節銀加充戶部糴本辛未遣周麟之使金賀遷都壬申權減荆南上供錢銀絹絲米之半招填禁軍是月金主亮率文武羣臣如汝洛五月癸酉給兩淮民兵荒田己丑命沿淮州郡毋

納北人辛卯金遣高景山王金來賀天申節及求淮漢地且以欽宗皇帝訃聞甲午為欽宗皇帝發喪特詔持斬衰三年乙未以吳璘為四川宣撫使仍命制置使王剛中同處置軍事六月丁未出宮女三百九十人蠲臨安府禁軍闕額錢五年己酉以御史中丞汪澈為湖北京西宣諭使乙卯以劉錡為淮南江東西浙西制置使戊午命帶御器械劉炎同提舉措置沿淮盜賊庚申以步軍司都統制戚方提總江上諸軍戊辰周麟之辭北

行以樞密都承旨徐嘉代之秋七月戊子周麟之分司
筠州居住辛卯振給淮南歸正人壬辰徐嘉等至盱眙
金主亮亟遣還之是月金主亮徙都汴京命其臣劉萼
由唐鄆瞰荆襄張中彥王彥章據秦鳳窺巴蜀蘇保衡
完顏鄭嘉努由海道趨兩浙八月辛丑忠義人魏勝復
海州李寶承制以勝知州事丙午蠲諸路逋欠經總制
錢江浙等路上供米丁未蠲淮南京西湖北民秋稅之
半乙卯劉錡引兵屯揚州遣統制王剛以兵五千屯寶

應丁巳召田師中赴行在以吳拱為鄂州諸軍都統制
壬戌復以資政殿學士張燾知建康府己巳起復成閔
為湖北京西制置使節制兩路軍馬九月庚午朔命大
臣朝饗太廟辛未宗祀徽宗于明堂以配上帝大赦甲
戌金人侵黃牛堡守將李彥堅拒却之金兵遂扼大散
關吳璘駐青野原遣將高松等援之庚辰以給事中黃
祖舜同知樞密院事乙酉詔劉錡王權李顯忠戚方嚴
備清河潁河渦河口丁亥成閔渡江屯應城縣遣吳拱

戊邳州博州民王友直聚兵大名自稱河北安撫制置使以其徒王任為副遣軍師馮穀入奏事吳璘劫金人于橋頭若辛卯金使以書至楚州守臣以聞壬辰監盱眙軍淮河渡夏俊復泗州癸巳金人攻通化軍守將張超拒卻之吳璘遣將劉海復秦州乙未金人攻信陽軍丙申吳璘遣將曹洙復洮州戊戌劉錡發揚州詔以金人背盟降敕榜詔諭中原軍民己亥蘭州漢軍千戶王宏殺其刺史溫都烏密來降吳璘遣將潘青復隴州冬

十月庚子朔詔將親征魏勝攻沂州敗還海州金人圍
之李寶以舟師至東海縣金人解圍去寶遂入海州辛
丑金人自渦口渡淮癸卯以吳璘兼陝西河東招討使
劉錡兼京東河北東路招討使成閔兼京西河北西路
招討使金人破蔣州李顯忠遣統制孔福與金人戰于
大人洲乙巳金人復攻海州魏勝李寶擊却之丁未命
宣撫制置司傅檄契丹西夏高麗渤海諸國及河北河
東陝西京東河南諸路諭出師共討金人是日金人立

其東京留守葛王褒為皇帝改元大定己酉知筠州武
鉅招納北界杜海等二萬人來歸庚戌知廬州龔濤棄
城走辛亥金蕭琦破滁州壬子以建王瑋為鎮南軍節
度使劉錡遣統制王剛等擊金人于清河口吳拱遣侯
俊和敦書復唐州癸丑借江浙荆湖等路坊場淨利錢
以備賞軍金人攻海州李寶力戰拒之解圍去甲寅金
人攻樊城吳拱遣守將翟貴王進與戰貴進俱死之金
兵亦退金主亮以大軍至廬州戚方遣張寶復蔣州乙

卯以金人渝盟告于天地宗廟社稷命州縣諭富民捐
貲助國劉錡歸揚州丙辰金主亮入廬州王權自昭關
遁統制姚興戰死權退保和州金州都統制王彥遣統
制任天錫復豐陽縣丁巳武鉅遣荀琛復鄧州戊午任
天錫復商洛縣命吳璘趣出兵漢中葉義問督視江淮
軍馬中書舍人虞允文參謀軍事金人攻真州步軍司
統制邵宏淵迎戰于胥浦橋敗績遂進攻揚州己未任
天錫復商州庚申以楊存中為御營宿衛使趙撙復襄

信縣王權自和州遁歸屯于東采石辛酉復湯思退觀
文殿大學士充醴泉觀使兼侍讀金人破和州壬戌劉
錡退軍瓜洲金人攻揚州淮東安撫使劉澤棄城奔泰
州以戶部侍郎劉岑為御營隨軍都轉運使李顯忠為
御營先鋒都統制屯蕪湖主管步軍司李捧為前軍都
統制趙搏復新蔡縣癸亥金人入揚州甲子復張浚觀
文殿大學士判潭州吳璘遣統制吳挺向起等擊金人
于德順軍之治平砦趙搏復平興縣乙丑金人趨瓜洲

劉錡遣統領員琦拒之于阜角林敗之丙寅李寶擊金
舟師于膠西縣之陳家島劉錡還鎮江府趙撙復蔡州
金人攻秦州向起吳挺擊却之丁卯葉義問至鎮江武
鉅復號州盧氏縣任天錫復朱陽縣戊辰殿中侍御史
杜莘老出知遂寧府十一月己巳邵宏淵遣統領崔臯
擊金人于定山任天錫復號州庚午通州守將蕭邦弼
棄城去辛未遣權吏部侍郎汪應辰詣浙東措置海道
壬申以張浚判建康府召王權赴行在以李顯忠代將

邵宏淵為池州都統制金人攻瓜洲鎮江中軍統制劉
汜敗走權都統制李橫亦遁金人奄至江上統制魏俊
王方死之金人游騎至無為軍守臣韓髦棄城走癸酉淮
寧府民陳亨祖執同知完顏雅魯以其城來歸趙撙棄
蔡州甲戌池州統制官崔定等復入無為軍乙亥金主
亮臨江期以翼日南渡丙子虞允文督建康諸軍統制
官張振等以舟師拒金主亮于東采石却之崔定復巢
縣任天錫復上津商洛二縣丁丑虞允文遣水軍統制

盛新以舟師擊金人于楊林河口又敗之金主亮焚其舟而去戊寅王彥遣楊堅復欒川縣己卯以湯思退為行宮留守虛恨蠻犯嘉州籠蓬堡官軍擊之敗績副將鄭祥等死之庚辰金主亮引軍趨淮東癸未吳璘自仙人原還興州留姚仲節制軍事虞允文自采石率李捧軍及戈船如鎮江金主亮至揚州乙酉貸劉汜死英州編管江州統制李貴忠義首領孟俊復順昌府金州將邗進復華州丙戌任天錫復陝州丁亥劉錡罷以御營

宿衛中軍統制劉銳權鎮江都統制戊子吳璘復力疾
上仙人原己丑貸王權死瓊州編管李寶泛海南歸金
人復攻陝州任天錫擊却之復攻襄陽統制官李麟等
拒却之復通化軍庚寅王彥遣將楊堅党清復長水縣
癸己以成閔為鎮江都統制淮東制置使京東西路河
北東路淮北如宿州招討使李顯忠為淮西制置使京
畿河北西路淮北壽亳州招討使吳拱為湖北京西制
置使京西北路招討使甲午武鉅遣鄉兵總轄杜隱等

復嵩州乙未金人破泰州是日金人弑其主亮于揚州
龜山寺戊戌金都督府遣人詣鎮江軍中議和十二月
己亥趙搏復蔡州王彥遣兵復福昌縣庚子金人侵漢
南之茨湖鄂州軍士史俊擊却之楊椿復廬州辛丑以
李寶為靖海軍節度使浙西通泰海州沿海制置使京
東東路招討使王彥遣閻玘復澠池縣癸卯命諸路招
討司率兵進討互相應援沿江諸大帥條陳恢復事宜
復岳州舊名右軍統領沙世堅入泰州甲辰均州統領

晉朝復鄧州丙午淮東統制王選復楚州丁未杜隱等
入河南府吳拱遣統領牛宏入汝州戊申帝發臨安庚
戌金人渡淮北去壬子次平江罷督視府癸丑淮東統
制劉銳陳敏引兵入泗州鄂州統制楊欽以舟師追擊
金人于洪澤鎮乙卯江北金兵盡去李顯忠復入和州
吳璘遣將復水洛城金人復破汝州牛宏敗走戊午次
鎮江府庚申吳璘拔治平砦壬戌曲赦新復州軍甲子
降淮南京西湖北雜犯死罪以下賞采石功進統制張

振時俊等官金穎壽二州巡檢高顯以壽春府來降是月金主知亮已死遂趨燕京

三十二年春正月戊辰朔日有食之帝在鎮江己巳金人攻壽春府忠義將劉泰戰死金兵引去庚午發鎮江府壬申至建康府壬午金人復攻蔡州趙搏力戰却之乙酉權知東平府耿京遣其將賈瑞掌書記辛棄疾來奏事己丑金主遣其臣高忠建等來告嗣位以耿京為天平軍節度使知東平府丙申以楊存中為江淮荆襄

路宣撫使虞允文副之旋改存中措置兩淮二月戊戌
罷借兩浙江淮坊場淨利錢以虞允文為兵部尚書川
陝宣諭使庚子興州統領惠逢等復河州振兩淮饑民
壬寅金人攻汝州守將王宣逆擊之癸卯帝發建康惠
逢復積石軍又克來羌城丁未劉錡薨己酉王宣及金
人再戰于汝州庚戌金人全師來攻宣敗績棄去辛亥
金人復攻順昌府孟新拒却之尋亦棄去乙卯至臨安
府興元都統制姚仲攻鞏州不下退守甘谷城遂引兵

圍德順軍丙辰金人攻蔡州趙搏擊却之乙丑王宣及右軍副將汲靖擊金人于確山縣趙搏棄蔡州丙寅金人復取之姚仲遣副將趙銓攻下鎮戎軍金同知渭州秦弼及其子嵩來歸王彥遣兵救陝州金兵引去丁卯吳拱遣將復永安軍永寧福昌長水三縣閏月癸酉金人破河州乙亥命楊存中李顯忠固守新復州軍量度進討丙子姚仲遣將復原州癸未振淮南歸正人金人攻虢州吳璘遣楊從儀等攻拔大散關分兵據和尚原

金人走寶鷄辛卯楊椿罷壬辰姚仲攻順德軍擊金人于瓦亭砦新店是月張安國等攻殺耿京李寶將王世隆攻安國執之以獻三月壬寅更定金使入境接伴館伴舊儀癸卯成閔遣統制杜彥救淮寧擊金人于項城縣乙巳加吳璘少傅王彥為保平軍節度使戊申吳璘復德順軍又遣嚴忠取環州辛亥命兵部侍郎陳俊卿工部侍郎許尹經畫兩淮堡砦屯田癸丑金人圍淮寧府守臣陳亨祖死之甲寅金人侵鎮戎軍丁巳遣洪邁

等賀金主即位戊午忠義軍統制知蘭州王宏拔會州
金人破淮寧府統領戴規死之辛酉金人攻原州夏四
月癸酉蠲淮東殘破州軍上供銀絹米麥及經總制錢
一年蒙縣民倪震率丁口數千來歸甲戌募民耕淮東
荒田蠲租徃七年戊寅以御史中丞汪澈參知政事金
人圍海州五月戊戌吳璘自河池如鳳翔巡邊壬寅姚
仲及金人戰于原州北嶺敗績戊申復以楊存中為醴
泉觀使奉朝請罷御營宿衛司辛亥鎮江都統制張子

蓋救海州擊金人于石湫堰金人解去甲寅命張浚專
一措置兩淮事務兼節制淮東西沿江州郡軍馬乙卯
知順昌軍孟昭率部曲來歸己未吳璘遣將復熙州壬
戌禁諸軍互招逃亡加鄭藻太尉振東北流民甲子詔
立建王瑋為皇太子更名昝加成閔太尉主管殿前司
李顯忠為太尉主管馬軍司籍諸州歸正人願為農者
給官田復租十年六月丙寅吳璘次大幽嶺檄召姚仲
下河池獄以夔路安撫使李師顏代將其兵乙亥朱倬

罷丙子詔皇太子即皇帝位帝稱太上皇帝退處德壽
宮皇后稱太上皇后孝宗即位累上尊號曰光堯壽聖
憲夫體道性仁誠德經武緯文紹業興統明謨盛烈太
上皇帝海熙十四年十月乙亥太上皇帝崩于德壽殿
年八十一諡曰聖神武文憲孝皇帝加謚受命中興全
功至德聖神武文昭仁憲孝皇帝廟號高宗攢于會稽
之永思陵

高宗建炎四年紹興三十二年凡三十六年

欽定續通志卷三十五

欽定四庫全書

史部

欽定續通志卷三十六

七

主事臣尹壯圖覆勘

總校官原任侍講臣王燕緒

欽定四庫全書

欽定續通志卷三十六

宋紀十二

孝宗

孝宗皇帝諱昀字元永太祖七世孫也初太祖少子秦王德芳生英國公惟憲惟憲生新興侯從郁從郁生華陰侯世將世將生慶國公令諱令諱生子偁是為秀王帝秀王子也始名伯琮高宗自元懿太子薨未有後昭

慈聖獻皇后自江西還行在勸高宗立太祖後人為嗣
僕射范宗尹亦造膝以請高宗曰太祖以神武定天下
子孫不得享之遭時多艱零落可憫朕若不法仁宗為
天下計何以慰在天之靈而上虞丞婁寅亮亦上書言
昌陵之後寢同民庶藝祖在上莫肯顧歆此金人所以
未悔禍也高宗大然之紹興二年五月選帝育于禁中
明年除和州防禦使賜名瑗旋改貴州五年授保慶軍
節度使封建國公歷加檢校少保進普安郡王十三年

九月秀王歿于秀州解官行服已改常德軍節度使三

十年二月立為皇子更名瑋授寧國軍節度使開府儀

同三司進封建王制出中外大悅

謹按通鑑輯覽

御

批高宗擇立孝宗為嗣當時多謂付托得人蓋以藝祖後

不克享有天下人心頗有餘憾一旦見昌陵之裔復繼大

統不覺溢美任情至以中興事業推許孝宗則竇過矣孝

宗雖承歡德壽鄉學右文不過蒙偏安之業端處晏然而

已中原侵地未能恢復尺寸而符離之役任

用非人遂至一敗不振所謂中興者安在也

明年改鎮南

軍節度使先是金人渝盟高宗下詔親征而兩淮失守

朝臣多陳退避之計帝請率師為前驅直講史浩以疾

在告聞之亟入為帝言太子不宜將兵乃為草奏請衛
從以共子職十二月遂扈蹕以行三十二年五月甲子
立為皇太子改今名六月乙亥內降御札皇太子可即
皇帝位朕稱太上皇帝丙子遣中使召帝入禁中面諭
之帝推遜不受即趨側殿門欲還東宮高宗勉諭再三
乃止於是高宗出御紫宸殿輔臣奏事畢高宗還宮百
官移班殿門外拜詔畢復入班殿庭內侍掖帝至御榻
前帝側立不坐內侍扶掖之乃略就坐宰相率百僚稱

賀帝遽興輔臣升殿固請帝愀然曰君父之命出於獨斷然此大位懼不克當班退太上皇帝即駕之德壽宮帝服袍履步出祥曦殿門冒雨掖輦以行及宮門弗止上皇麾謝再三且令左右扶掖以還顧曰吾付托得人吾無憾矣左右皆呼萬歲是日詔有司議太上皇帝太上皇后尊號以閏丁丑朝德壽宮戊寅大赦詔宰相率百官月兩朝德壽宮己卯以即位告于天地宗廟社稷庚辰詔五日一朝德壽宮甲申詔中外士庶陳時政闕

失丁亥詔以太上皇不許五日一朝自今月四朝復胡
銓官知饒州甲午上太上皇帝尊號曰光堯壽聖太上
皇帝太上皇后曰壽聖太上皇后乙未金人屠原州秋
七月戊戌興州中軍統制吳挺復鞏州癸卯以張浚為
少傅江淮宣撫使封魏國公甲辰以參知政事汪澈視
師湖北京西遣劉琪等使金告即位戊申以四川宣撫
使吳玠兼陝西河東路宣撫招討使追復岳飛元官以
禮改葬癸丑馬軍司中軍統制趙搏忠義軍統領皇甫

侗復光州甲寅詔淮南諸州存恤淮北來歸之民權免
稅役丙辰以少保保康軍節度使吳益為少傅太尉寧
武軍節度使吳蓋為開府儀同三司丁巳罷李寶措置
海道壬戌以黃祖舜兼權參知政事罷諸路聖節進奉
蠲四川積年逋負八月乙丑四川馬軍統制高師中與
金人戰于摧沙敗死丙寅吳璘與金人戰于德順軍已
巳以翰林學士史浩參知政事戊寅率羣臣詣德壽宮
奉上太上皇帝太上皇后尊號冊寶丁亥班寬恤事十

八條起居舍人洪邁知閣門事張掄坐奉使辱命罷甲申吳璘擊金人于北山戊子追復李光資政殿學士趙鼎范冲並還合得恩數九月甲午以子愔為少保永興軍節度使進封御王愷為雄武軍節度使開府儀同三司進封慶王惇為鎮洮軍節度使開府儀同三司進封恭王甲午金人攻德順軍東山堡中軍將李庠戰死丁酉川陝宣諭使虞允文罷辛亥振淮東義兵及歸正人以總領四川財賦軍馬錢糧王之望為戶部侍郎川陝

宣諭使乙卯詔虞允文赴吳璘軍議事辛酉以吳璘為少師冬十月戊辰以岳陽軍節度使居廣開府儀同三司史浩兼權知樞密院事己巳葉義問罷庚午以恩平罷王璩為少保壬午官岳飛孫六人甲申契丹招討蕭哲伯來奔金人攻順德城吳璘擊走之復遣兵追襲敗歸戊子以資政殿學士張燾同知樞密院事十一月庚子以蕭哲伯為忠州團練使乙巳金人攻水洛城戊申詔改明年為隆興元年辛亥免楊存中所獻酒坊逋負

錢辛酉史浩免權知樞密院事十二月乙丑詔宰臣復兼樞密使金人攻隴城縣官軍拒却之丙寅詔棄德順城丁卯以陳康伯兼樞密使戊辰詔侍從臺諫集議當今弊事仍命盡率其屬極言無隱辛未劉琪張說還自盱眙戊寅蠲四川赦前登帶白契稅錢辛卯廣西賊王宣破藤州守臣廖顥棄城遁

隆興元年春正月壬辰朔羣臣朝于文德殿帝朝德壽宮甲午四川宣撫司奉詔班師庚子以史浩為尚書右

僕射同中書門下平章事兼樞密使張浚進樞密使都督江淮東西路軍馬二月壬戌以布衣李信為兵部員外郎齎蠟書徃中原招豪傑之據有州郡者安慶軍節度使士錢乞減奉賜之半以助軍用戊辰宰執陳康伯等乞再減奉止存舊格之半許之己卯振兩淮流民及山東歸正忠義軍癸未黃祖舜罷庚寅遂秦檜黨人仍禁輒至行在三月壬辰金右副元帥赫舍哩志寧以書取侵地癸巳以張燾為參知政事御史中丞辛次膺同知

樞密院事葉義問落端明殿學士饒州居住丁酉詔戶部置局議節浮費己亥楊存中等乞減半奉如宰執例許之己酉張燕罷庚申以久雨命有司振災傷察刑禁夏四月戊辰張浚入見議出師渡淮乙亥王之望罷壬午詔戶部臺諫議節浮費戊子張浚命邵宏淵帥師次盱眙乙丑又命李顯忠帥師次定遠是月金人拔環州守臣強寬及其弟震死之五月丁酉李顯忠復靈璧縣庚子復虹縣金知泗州富察都木達及同知泗州大周

仁降壬寅張浚渡江視師癸卯金右翼軍都統蕭琦降
于李顯忠甲辰顯忠及邵宏淵擊金人于宿州乙巳史
浩罷丙午復宿州建康前軍統領官王珙戰死丁未以
辛次膺為參知政事翰林學士承旨洪遵同知樞密院
事督諸路開營田金赫舍哩志寧自睢陽引兵至宿州
李顯忠擊却之壬子顯忠與金人戰于宿州不利是夜
建康中軍統制周宏及邵宏淵之子世雄殿前司統制
官左士淵逃歸癸丑進李顯忠開府儀同三司淮南京

畿京東河北招討使邵宏淵檢校少保寧遠軍節度使
招討副使金人攻宿州顯忠擊却之甲寅李顯忠邵宏
淵軍大潰于符離乙卯下詔親征丙辰以張浚兼都督
荆襄軍馬張浚以劉寶為鎮江諸軍都統制六月庚申
朔日有食之癸亥張浚乞致仕且請通好皆不許丁卯
以觀文殿大學士湯思退為醴泉觀使兼侍讀戊辰召
虞允文以兵部侍郎周葵為參知政事汪澈落資政殿
學士台州居住辛未罷李顯忠軍職壬申以太傅楊存

中為御營使節制殿前司軍馬癸酉下詔罪已張浚降
授特進仍前樞密使江淮東西路宣撫使官屬各奪二
官邵宏淵降武義大夫戊寅詔展巡幸之期辛次膺罷
己卯李顯忠責授清遠軍節度副使筠州安置辛巳命
浙西副都總管李寶兼御營統制官措置浙西海道甲
申以數文閣學士虞允文為兵部尚書兼湖北京西宣
諭使戊子放宮人三十人以蕭琦為檢校少保河北招
撫使秋七月庚寅以虞允文為湖北京西制置使癸巳

以湯思退為尚書右僕射同中書門下平章事兼樞密使李顯忠再責授果州團練副使潭州安置乙未詔宿州棄軍將佐奪官貶竄有差乙巳以旱蝗星變詔侍從臺諫兩省官條上時政闕失戊午給還岳飛田宅八月丙寅張浚復都督江淮軍馬庚午以劉寶兼淮東招撫使丙子以飛蝗風水災避殿減膳罷借諸路職田之令戊寅金赫舍哩志寧又以書求海泗唐鄧四州地及歲幣丙戌遣淮西安撫司幹辦公事盧仲賢等齎書至金

帥府戒勿許四州差減歲幣仍命諸將毋遣兵人出境
九月己酉楊存中罷冬十月丙子詔太上皇后教旨改
稱聖旨立賢妃夏氏為皇后十一月己丑盧仲賢自宿
州以金都元帥布薩忠義遺三省樞密院書來庚子遣
王之望等為金國通問使辛丑詔侍從臺諫於後省集
議講和遣使禮數土貢四事丙午盧仲賢坐擅許金地
下大理寺奪三官癸丑以胡昉楊由義為使金通問國
信所審議官十二月己未陳康伯罷丁丑以湯思退為尚

書左僕射張浚為右僕射並同中書門下平章事兼樞密使浚仍都督江淮東西路軍馬是歲以兩浙大水旱蝗江東大水悉蠲其租

二年春正月辛卯詔增德壽宮車輦儀衛乙未及皇后朝德壽宮丙申命虞允文討廣西諸盜丙午金布薩忠義復以書來壬子振歸正人二月辛未蠲秀州貧民逋租壬申容州妖賊李雲作亂癸酉復王權為廣西路都鈐轄丙子詔飭將帥減文武官及百司吏郊賜之半丁

丑李雲伏誅乙酉胡昉自宿州還三月丙戌張浚視師于淮又詔王之望等以幣還丁亥詔荆襄川陝帥臣嚴邊備毋先事妄舉盧仲賢除名械送郴州編管壬寅詔知光州皇甫侗母招納歸正人庚戌以戶部侍郎錢端禮為淮東宣諭使吏部侍郎王之望為淮西宣諭使壬子減高藤雷容四州雜犯死罪以下蠲夏秋稅賦癸丑以王彥為建康諸軍都統制兼淮西招撫使夏四月庚申張浚還朝甲子以李顯忠侵欺官錢給還諸軍丁丑

張浚罷五月丙申詔吳璘毋招納歸正人辛丑江西總
管邵宏淵責授靖州團練副使南安軍安置六月甲寅
朔日有食之辛酉以淫雨詔州縣理滯囚丁丑賑江東
兩淮被水貧民秋七月乙酉以戶部尚書韓仲道為湖
北京西制置使丁亥洪遵罷己丑以周葵兼權知樞密
院事己巳命海泗州徹戍戊申蠲淮東內庫坊場錢一
年庚戌洪遵落端明殿學士癸丑以江東浙西大水詔
侍從臺諫卿監郎官館職陳闕失及當今急務八月甲

寅朔以災異避殿減膳戊午南丹州莫延廩為諸蠻所
逐來歸甲子以久雨決繫囚庚辰以資政殿大學士賀
允中為知樞密院事兼參知政事辛巳詔振淮東被水
州縣張浚薨壬午遣魏杞等為金國通問使九月辛丑
以王之望為參知政事權刑部侍郎吳芾為給事中兼
淮西宣諭使以久雨出內庫金糴米賑貧民癸卯命湯思
退都督江淮東西路軍馬辭不行乙巳復命楊存中為
同都督錢端禮吳芾並為都督府參贊軍事仍易國書

以付魏杞冬十月甲寅魏杞至盱眙未得進丁卯賀允
中罷為資政殿大學士致仕己己以周葵兼權知樞密
院事王之望兼同知樞密院事庚辰蠲京西湖北運糧
所經州縣秋稅之半以靖海軍節度使李寶為沿海駐
劄御前水軍都統制辛己金人分道渡淮劉寶棄楚州
遁十一月乙酉知楚州魏勝與金人戰死之金人克楚
州進陷濠州滁州戊子以金人侵擾詔郊杞改用明年
命王之望同都督江淮軍馬湯思退罷都督召陳康伯

己丑王之望罷同都督庚寅命楊存中都督江淮軍馬
辛卯湯思退罷尋落觀文殿大學士永州居住未至而
卒甲午禁太學生伏闕是日太學生張觀等七十二人
上書請斬湯思退王之望尹檣而用陳康伯胡銓等丙
申遣國信所大通事王抃持周葵書如金帥府請正皇
帝號為叔姪之國易歲貢為歲幣減十萬割商秦地歸
被俘人惟叛亡者不與以金人侵淮南詔避殿減膳丁
酉詔擇日視師戊戌以少保觀文殿大學士陳康伯為

尚書左僕射同中書門下平章事兼樞密使庚子遣兵部侍郎胡銓右諫議大夫尹檣分詣兩浙措置海道壬寅詔侍從兩省官日一至都堂議事有關臺諫者亦聽會議以顯謨閣學士虞允文同簽書樞密院事甲辰金人攻六合並軍司統制崔皋擊却之乙巳以錢端禮兼權參知政事丁未以顯謨閣直學士沈介為沿江制置使命沿江諸州調保甲分守渡口閏月甲寅陳康伯入見丙辰周葵罷王抃得報書以歸戊午蕭琦卒壬戌罷

胡銓尹穉丙寅召韓仲通以沈介為兵部尚書湖北京西制置使戊辰以金人且退詔督府擇利擊之王之望不可乙亥之望罷丙子以王抃為奉使金國通問國信所參議官持陳康伯報書以行丁丑金遣張恭愈來迓使者十二月辛卯以錢端禮為參知政事兼知樞密院事虞允文同知樞密院事兼權參知政事禮部尚書王剛中簽書樞密院事丙申制應沿邊被兵州軍除逃遁官吏不赦外雜犯死罪情輕者減一等餘並放遣遣洪

迨等賀金主生辰壬寅罷三衙江上荆襄諸軍招軍甲辰遣沿海水軍還屯巳酉朝獻景靈宮庚戌朝饗太廟乾道元年春正月辛亥朔合祀天地于園丘大赦改元丁巳淮西安撫韓璉勒停賀州編管壬申詔兩浙振流民癸酉蠲沿邊殘破州軍官賦一年甲戌劉寶責果州團練副使瓊州安置二月庚辰朔朝德壽宮從太上皇太上皇后如四聖觀乙酉遣官檢察兩淮州縣振濟饑民庚子以楊存中為寧遠昭慶軍節度使甲辰以久雨

避殿減膳蠲兩淮災傷州縣身丁錢絹決繫囚丁未陳
康伯薨三月庚申以虞允文為參知政事兼同知樞密
院事王剛中同知樞密院事命淮西湖北荆襄帥臣措
置屯田復置榷場癸亥黃祖舜薨夏四月庚子金使完
顏仲等來報聘五月庚戌以吳璘為太傅封新安郡王
壬申蠲四川州縣虛額錢吳璘改判興元府丙子遣李
若川等使金賀上尊號六月癸未王剛中薨丙戌以翰
林學士洪适簽書樞密院事辛卯以武經郎令德為安

定郡王壬辰以淮南轉運判官姚岳言境內飛蝗自死
奪一官罷之壬寅蠲廣東殘破州縣租秋七月甲寅借
職田租二年以裨經費己巳蠲關外四州民今年租及
湖南被賊州縣夏稅八月乙酉立子愔為皇太子丁亥
虞允文罷戊子大赦己丑以洪适為參知政事兼權知
樞密院事吏部侍郎葉顥簽書樞密院事兼權參知政
事癸巳錢端禮罷為資政殿大學士提舉萬壽觀九月
甲戌以端明殿學士汪澈知樞密院事洪适兼同知樞

密院事冬十月己卯遣方慈等使金賀正旦丁酉金遣
高衍等來賀會慶節乙巳淮北紅巾賊踰淮劫掠辛未
遣龍大淵撫諭兩淮措置屯田督捕盜賊十二月戊寅
以洪适為尚書右僕射同中書門下平章事兼樞密使
汪澈為樞密使癸未遣王曦等賀金主生辰庚寅以葉
顥為參知政事兼同知樞密院事壬寅金遣烏庫哩忠
弼等來賀明年正旦

二年春正月辛酉省六合戍兵以所墾田給還復業之

民二月丁丑罷盱眙也田振兩浙江東饑戊寅如玉津園宴射遂至龍井三月辛未罷洪适右僕射癸酉以給事中權吏部尚書魏杞同知樞密院事兼權參知政事丁丑罷和糴夏四月戊寅以久雨減大理三衙臨安府及浙西州縣雜犯死罪以下一等乙未汪澈罷五月戊申張燾薨庚戌葉顥罷以魏杞為參知政事右諫議大夫林安宅同知樞密院事兼權參知政事中書舍人蔣芾簽書樞密院事六月庚辰封孫挺為福州觀察使榮

國公據為左千牛衛大將軍秋七月甲寅以鎮江都統
制戚方為武當軍節度使八月丁丑蠲淮南放歸萬弩
手差役二年戊子以魏杞兼同知樞密院事蔣芾權參
知政事甲午立中興以來十三處戰功格目乙未以吳
璘復判興州九月辛亥遣官按視温州水災振貸民決
繫囚冬十月乙亥遣薛良朋等使金賀正旦巳卯減饒
州歲貢金三之一蠲諸路酒坊逋賦辛卯金遣魏子平
等來賀會慶節十一月丙午楊存中薨己酉盡出內藏

及南庫銀以易會子官司並以錢銀支遣民間從便兩
淮總領所許自造會子鬻諸路營田十二月乙亥遣梁
克家等賀金主生辰巳卯以資政殿學士葉顥知樞密
院事甲申以葉顥為尚書左僕射魏杞右僕射並同中
書門下平章事兼樞密使蔣芾參知政事吏部尚書陳
俊卿同知樞密院事兼權參知政事庚寅詔宰相領兼
制國用使參知政事同知國用事丙申金遣烏庫哩元
忠等來賀明年正旦

三年春二月癸酉出龍大淵為江東總管曾覲為淮西
總管甲戌大淵改浙東覲改福建辛巳以端明殿學士
虞允文知樞密院事三月甲辰從太上皇太上皇后如
聚景園壬戌伯母秀王夫人張氏薨夏四月辛未蠲諸
路州軍逋負戊寅以吳璘知興元府充利州路安撫使
四川宣撫使五月甲寅吳璘薨庚申以四川制置使汪
應辰主管宣撫司事移司利州六月己巳以汪應辰權
節制利州路屯駐御前軍馬甲戌以虞允文為資政殿

大學士四川宣撫使乙亥金遣使來取被俘人詔實俘
在民間者還之軍中人及叛亡者不預戊寅復以虞允
文為知樞密院事充宣撫使辛卯皇后夏氏崩振泉州
水災秋七月壬寅以皇太子疾減雜犯死罪以下乙巳
皇太子薨閏月丁亥戚方落節鉞信州居住八月甲寅
以久雨命臨安府決繫囚丁巳蠲光濠廬三州壽春府
賦一年戊午遣官分決滯獄壬戌以知建康府史正志
兼沿江水軍制置使冬十月丁酉遣唐瑑等使金賀正

旦戊戌以嗣濮王士勗為開府儀同三司乙卯金遣富
察蘇爾幹等來賀會慶節十一月丙寅合祀天地于圜
丘大赦癸酉葉顥魏杞罷以陳俊卿為參知政事翰林
學士劉珙同知樞密院事丁丑以雷發非時詔臺諫侍
從兩省官指陳闕失十二月己亥遣王淪賀金主生辰
辛亥以吳益為太傅庚申金遣圖克坦忠衛等來賀明
年正旦

四年春正月壬午奪秦垣秦堪郊恩蔭補甲申如天竺

寺遂至玉津園壬辰葉顥薨二月甲午罷福建路膏鈔
鹽蠲轉運司歲發鈔鹽錢己亥以蔣芾為尚書右僕射
同中書門下平章事兼樞密使兼制國用使觀文殿大
學士史浩為四川制置使浩辭不行乙巳賜王炎出身
簽書樞密院事三月庚午以敷文閣待制晁公武為四
川安撫制置使夏四月丙辰禮部員外郎李燾上所著
續通鑑長編自建隆至治平一百八卷是月振綿漢等
州饑五月丙戌行乾道新歷丁亥以饒信二州建寧府

饑民嘯聚遣官措置振濟是月西夏任敬德遣使至四
川宣撫司約發兵攻西番六月戊戌蜀諸路逋負乾道
元年二月和市折帛雜色錢辛丑龍大淵卒戊午蔣芾
罷秋七月壬戌以劉珙兼參知政事召建寧府布衣魏
掞之赴行在丁亥以經總制餘剩錢椿留邛蜀州以備
振濟己丑以久雨慮囚減臨安府三衙死罪以下是月
西夏遣間使來八月庚戌劉珙罷冬十月壬辰遣鄭聞
等使金賀正旦甲午禁歸正人藏匿金人者庚子蔣芾

起復尚書左僕射陳俊卿右僕射並同中書門下平章
事兼樞密使兼制國用使甲辰大閱己酉金遣伊喇山
圖罕等來賀會慶節十一月壬戌遣知無為軍徐子寅
措置楚州官田招集歸正忠義人以耕乙亥詔峽州布
衣郭雍赴行在壬申蠲兩淮歸正人後五年癸未封岳
陽軍節度使居廣為永陽郡王十二月丙申遣胡元質
等賀金主生辰甲辰蔣芾辭起復減兩浙江東西路明
年夏稅和市之半甲寅金遣完顏仲仁等來賀明年正

旦

五年春正月甲戌措置兩淮屯田二月壬寅以給事中
梁克家簽書樞密院事甲辰以王炎參知政事兼同知
樞密院事三月己巳蠲成都府路民戶歲輸對糴米脚
錢乙亥以王炎為四川宣撫使仍參知政事夏四月壬
辰以梁克家兼參知政事辛亥振衢婺饒信四州流民
六月己酉以虞允文為樞密使秋七月乙丑以曾覲為
浙東總管八月甲申朔日有食之己丑以陳俊卿為尚

書左僕射虞允文為尚書右僕射並同中書門下平章
事兼樞密使兼制國用使九月壬申命淮西安撫司參
議官許子中措置淮西山水砦招集歸正人墾官田冬
十月乙酉遣汪大猷等使金賀正旦戊子振溫台二州
被水貧民已亥命饒信二州歲量留上供米以備振糶
癸卯金遣高德基等來賀會慶節十二月己丑遣司馬
伋等賀金主生辰戊申金遣完顏毅等來賀明年正旦
六年春正月癸丑雅州沙平蠻寇邊焚碉門砦四川制

置使晁公武討之不利庚午以奉國軍承宣使知廬州
郭振為武泰軍節度使二月辛卯王炎遣人約沙平蠻
歸部稍捐邊稅與之三月庚申從太上皇太上皇后如
聚景園辛未復如聚景園戊寅以知紹興府史浩為檢
校少傅保寧軍節度使夏五月己巳陳俊卿罷為觀文
殿大學士知福州罷行在至鎮江征稅所比近者十有
三閏月戊子遣范成大等使金求陵寢地且請更定受
書禮辛卯青吏部侍郎陳良祐筠州居住癸巳以梁克

家為參知政事兼同知樞密院事甲辰辛次膺薨秋九月辛丑沅州猛相讐殺守臣孫叔傑擊之不利猛進迫州城安撫司諭解之叔傑尋抵罪冬十月辛酉遣呂正已等使金賀正旦丁卯金遣耶律子敬等來賀會慶節甲戌起居舍人趙雄請置局議恢復以雄為中書舍人十一月壬午合祀天地于闕丘大赦是月遣趙雄等賀金主生辰及請更受書之禮十二月戊申大閱壬申金遣富察愿等來賀明年正旦

七年春正月丙子帝率羣臣奉上太上皇帝太上皇后尊號冊寶于德壽宮二月癸丑立子惇為皇太子大赦以慶王愷為雄武保寧軍節度使判寧國府進封魏王丁卯太傅大寧郡王吳益薨三月乙亥趙雄至金金拒其請詔訓習水軍丙子立恭王夫人李氏為皇太子妃已卯起復劉珙同知樞密院事以明州觀察使知閣門事兼樞密都承旨張說簽書樞密院事戊子說罷為安慶軍節度使提舉萬壽觀夏四月壬戌從太上皇太上

皇后如聚景園丁亥劉珙起復同知樞密院事為荆襄宣撫使珙辭不拜庚寅金人葬欽宗于鞏原秋七月庚子以王炎為樞密使四川宣撫使八月丙辰詔兩淮民丁充民兵者本名丁錢勿輸甲申從太上皇太上皇后如東園戊子安定郡王令德薨冬十月己酉遣莫濛等使金賀正旦壬戌金遣烏凌阿天錫等來賀會慶節十二月丁未遣程紱等賀金主生辰丙寅金遣完顏宗寧等來賀明年正旦是歲湖南江東西路旱振之

八年春正月丁酉朝獻景靈宮遂如天竺寺玉津園二月乙巳詔改尚書左右僕射同中書門下平章事為左右丞相戊申遣姚憲等使金賀上尊號附請受書之事辛亥以虞允文為左丞相梁克家為右丞相並兼樞密使癸丑以安慶軍節度使張說吏部侍郎王之奇並簽書樞密院事夏四月己酉出殿中侍御史蕭之敏提點江東刑獄乙丑詔再蠲兩淮二稅一年六月庚子以武德郎令擡為金州觀察使封安定郡王秋七月

辛巳罷淮西屯田官兵募歸正人耕佃九月乙亥詔王
炎赴都堂治事戊寅以虞允文為少保武安軍節度使
四川宣撫使封雍國公己丑賜允文家廟祭器冬十月
丁未遣馮摶等使金賀正旦丙辰金遣夾谷清臣等來
賀會慶節罷借諸路職田十一月庚寅進檢校少傅知
福州史浩開府儀同三司十二月戊戌蠲兩淮明年租
賦甲辰詔京西歸正人授田如兩淮丁巳遣韓元吉等
賀金主生辰辛酉金遣曹望之等來賀明年正旦

九年春正月辛未王之竒罷為淮南安撫使王炎罷為
觀文殿大學士提舉洞霄宮乙亥以張說同知樞密院
事戶部侍郎沈夏簽書樞密院事戊寅以刑部尚書鄭
開簽書樞密院事閏月戊申以久雨命大理三衙臨安
府及兩浙州縣決繫囚減雜犯死罪以下辛酉如天竺
寺玉津園二月壬申蠲江西旱傷五州逋負米乙亥青
羌奴兒結寇安靜砦黎州推官黎商老戰死三月甲午
禁北界博易銀絹戊申從太上皇帝太上皇后如聚景

園夏五月壬辰朔日有食之己未以迪功郎朱熹屢詔不起特改宣教郎主管台州崇道觀六月甲戌禁兩淮荆襄四川諸州籍民戶馬秋七月壬寅青羌奴兒結降辛亥吐蕃彌羗裔列陷安靜峇引兵深入黎州守臣誘邛部川蠻擊却之九月庚子命盱眙軍以受書禮移牒泗州示金生辰使金使不從冬十月甲子遣留正等使金賀正且辛未梁克家罷為觀文殿大學士知建寧府甲戌以曾懷為右丞相張說知樞密院事鄭聞參知政

事沈夏同知樞密院事庚辰金遣完顏襄等來賀會慶
節丁亥襄等入辭別函申議受書之禮仍示虞允文速
為邊備十一月戊戌合祀天地于圜丘大赦改明年元
為淳熙十二月甲子沈夏罷乙丑以御史中丞姚憲簽
書樞密院事遣韓彥直等賀金主生辰乙亥以嗣濮王
士勰永陽郡王居廣並為少保乙酉金遣完顏璋等來
賀明年正旦

淳熙元年春正月乙未禁淮西諸關採伐林木庚子罷

兩淮將帥權攝官丙午禁兩淮耕牛出境以交趾入貢
賜國名安南封南平王李天祚為安南國王二月癸酉
虞允文薨丙申以鄭聞為資政殿大學士四川宣撫使
戊申如玉津園癸丑金遣梁肅等來計事夏四月戊辰
從太上皇如聚景園壬申許桂陽軍谿洞子弟入州學
聽讀乙亥詔四川宣撫司教閱諸州將兵戊寅遣張子
顏等使金報聘己卯以姚憲參知政事戶部尚書葉衡
簽書樞密院事六月丙辰朔詔禮官討論別建四祖廟

正太祖東嚮位戊午以興州都統制吳挺為定江軍節
度使戊寅曾懷罷癸未姚憲罷甲申落憲端明殿學士
罷宮觀以葉衡參知政事秋七月丁亥以鄭聞參知政
事以成都府路安撫使薛良朋為四川安撫制置使壬
辰以曾懷為右丞相己酉責姚憲南康軍居住八月己
未張說罷為太尉提舉隆興府玉隆觀以徽猷閣學士
楊俛為昭慶軍節度使簽書樞密院事九月乙酉以曾
觀開府儀同三司壬寅如玉津園宴射冬十月壬戌遣蔡洸使

金賀正旦癸亥以積兩命中外決繫因丙寅鄭聞薨乙亥金遣完顏讓等來賀會慶節辛巳再蠲臨安府民身丁錢三年壬午蠲郴州桂陽軍借貸常平米十一月甲申朔日有食之戊戌以禮部侍郎龔茂良參知政事楊俊罷以葉衡兼權知樞密院事丙午曾懷罷戊申以葉衡為右丞相兼樞密使十二月丁巳以吏部尚書李彥穎簽書樞密院事壬戌遣吳琚等賀金主生辰壬申金遣劉仲誨等來賀明年正旦以資政殿學士知江陵府

沈夏為四川宣撫使

二年春正月癸巳前宰相梁克家曾懷坐擅改堂除克家落觀文殿學士懷降為觀文殿學士三月丙申以太上皇壽七十詔禮官討論慶壽典禮夏四月己巳如玉津園是月茶寇賴文政起湖北轉入湖南江西官軍數為所敗命江州都統皇甫倜招之五月辛卯諭宰相以朝政闕失士民皆得獻言庚子命鄂州都統李川調兵捕茶寇六月庚戌以沈夏同知樞密院事丁卯落蔣芾

王炎觀文殿大學士張說落節度使芾建昌軍炎袁州
說撫州居住戊辰振湖南江西被寇州縣是月茶寇自
湖南犯廣東秋八月丙辰江西總管賈和仲以捕寇失
律除名賀州編管丁卯蠲湖南江西被寇州縣租丁丑
遣左司諫湯和彥等使金申議九月乙酉振淮南水旱
州縣乙未葉衡罷丁未沈夏罷閏月丁巳以李彥穎參
知政事翰林學士王淮簽書樞密院事是月江西提刑
辛棄疾誘賴文政殺之茶寇平冬十月乙酉遣謝廓然

等使金賀正旦戊戌金遣完顏禧等來賀會慶節十一
月戊申朔奉上太上皇帝太上皇后尊號冊寶于德壽
宮戊午提點坑冶王揖進羨餘却之十二月辛巳遣張
宗元等賀金主生辰甲午朝德壽宮行慶壽禮大赦甲
辰金遣完顏迨等來賀明年正旦

三年春正月甲寅以常州旱寬其逋負之半振淮東饑
仍貸貧民種乙丑振恤歸正人二月壬午蠲兩淮教閱
民兵夏稅癸未以伯圭為安德軍節度使三月丙午朔日有

食之癸亥如報恩寺遂至聚景園夏四月辛巳靖州徭人寇邊遣兵討捕之己丑責授葉衡安德軍節度副使彬州安置六月乙酉減四川酒課甲午以朱熹為秘書郎熹不就秋七月乙丑禁浙西園田八月乙亥以王淮同知樞密院事禮部尚書趙雄簽書樞密院事庚辰太上皇詔立貴妃謝氏為皇后壬午以久雨命中外決繫囚戊戌靖州徭寇平冬十月甲戌以久雨命中外決繫囚癸未遣閻蒼舒等使金賀正且壬辰金遣富察通等

來賀會慶節十一月癸丑合祀天地于園丘大赦庚午
遣張子正等賀金主生辰十二月己丑黎州蠻寇邊官
軍失利蠻亦遁去戊戌金遣劉玃等來賀明年正旦是
歲京西湖北諸州興元府金洋州旱紹興府台婺州水
並振之

四年春正月戊申詔自今內外諸軍歲一閱試庚申詔
沿江諸軍歲再習水戰二月乙亥如太學謁先聖遂如
武學謁武成王廟監學官進秩一等諸生推恩賜帛有

差戊戌以新知荆南府胡元質為四川安撫制置使兼
知成都府三月乙巳以史浩為少保觀文殿大學士醴
泉觀使兼侍讀進封永國公庚戌如王津園宴射壬子
貸隨郢二州饑民米丙寅如聚景園夏五月庚子如佑
聖觀罷四川和糴六月丁丑龔茂良罷己卯以王淮參
知政事秋七月辛丑禁江上諸軍盜易戰馬振襄陽饑
民乙酉罷臨川伯王雱從祀癸丑龔茂良責授寧遠軍
節度副使英州安置甲寅申嚴四川入蕃茶禁八月辛

己禁耕牛過淮九月丁酉朔日有食之辛丑免宰執以下會慶節進奉戊午閱蹴鞠于選德殿冬十月丙子以从陰命中外決繫囚遣錢良臣等使金賀正旦丁亥金遣完顏忠等來賀會慶節十一月庚子以趙雄同知樞密院事癸亥遣趙思等賀金主生辰十二月乙亥大閱辛巳蠲太平州民貸常平錢米壬辰金遣完顏炳等來賀明年正旦是歲福州建寧府南劍州水並振之

五年春正月辛丑戒有司毋以程頤王安石之說取士

二月庚寅威州蠻寇邊三月丁未李彥穎罷士子以史
浩為右丞相丁巳如玉津園己未以王淮知樞密院事
趙雄參知政事是春黎州蠻降夏四月乙丑詔葉衡任
便居住丙寅以禮部尚書范成大參知政事五月丁未
禁諸路州軍進羨餘六月乙亥范成大罷癸未詔京西
湖北商人以牛馬負茶出境者罪死以給事中錢良臣
簽書樞密院事己丑罷諸州私置稅場減四川茶課庚
寅蠲大理寺贓錢閏月戊戌罷興州都統司營田官兵

募民耕佃庚戌蠲秀州民折帛錢秋七月甲子太尉提
舉萬壽觀李顯忠薨冬十月庚子遣宇文价等使金賀
正旦辛亥金遣張九思等來賀會慶節戊午以孫右千
牛衛大將軍擴為明州觀察使封英國公十一月甲戌
史浩罷為少傅充醴泉觀使兼侍讀乙亥以錢良臣參
知政事丁丑以趙雄為右丞相王淮為樞密使十二月
庚寅朔班新定薦舉式辛卯遣錢冲之等賀金主生辰
丁酉罷興元都統司營田官兵募民耕佃丙辰金遣烏

雅察等來賀明年正旦

六年春正月戊辰振淮東饑民壬申蠲夔州路上供金
銀二月己丑如佑聖觀三月庚申如聚景園己巳郴州
賊陳峒等破連道州桂陽軍諸縣命湖南帥臣討捕之
辛未再振淮東饑民庚辰如玉津園夏五月庚午蠲四
川鹽課乙亥郴寇平癸未給襄陽歸正人田六月戊戌
蠲郴州運糧丁夫今年役錢之半辛亥廣西妖賊李接
破鬱林州守臣李端卿棄城遁遂圍化州命經略司討

捕之端卿除名勒停梅州編管秋九月辛未合祭天地
于明堂大赦冬十月乙酉蠲連州被寇民租辛卯遣陳
峴等使金賀正旦庚子再蠲四川鹽課辛丑蠲紹興府
逋賦乙巳金遣富察鼎壽等來賀會慶節戊申廣西妖
賊平十一月癸未遣傅淇等賀金主生辰十二月丙戌
班重修淳熙敕令格式庚戌金遣耶律慥等來賀明年
正旦辛亥蠲臨安府租徭一年

七年春正月甲子減廣西諸州歲賣鹽數庚辰蠲淮東

民貸常平錢米二月己亥出湖南椿穡米振永邵郴三
州乙巳封子棟為安定郡王三月壬戌詔舉賢良方正
能直言極諫者庚午迺太上皇帝太上皇后宴翠寒堂
丁丑再蠲臨安府民身丁錢三年詔諸州招補軍籍之
闕自今歲以為常夏四月甲申如聚景園戊子除明州
積欠諸司錢辛卯再免沿邊歸正人請占官田賦役三
年甲辰黎州五部落犯盜佗峇兵馬都監高晃與戰敗
績五月戊辰以吏部尚書周必大參知政事刑部尚書

謝廓然簽書樞密院事袁州分宜縣大水捐其稅己卯
申飭書坊擅刻書籍之禁六月丙戌以特進觀文殿大
學士判建康府陳俊卿為少保壬辰五部落再犯黎州
制置司鈐轄成光延與戰敗績提點刑獄權州事折知
常棄城遁甲午制置司益遣兵討平之秋七月丁卯以
旱決繫囚八月癸未禁黎州官吏市蕃商物九月壬申
禁諸路邊糴冬十月戊子遣葉宏等使金賀正旦乙未
黎州五部落進馬乞降詔却馬許其互市庚子金遣李

僧等來賀會慶節十一月癸丑詔邊吏存恤江西過淮
饑民丁巳禁淮南諸司州郡抑配民酒辛酉蠲兩淮州
軍二稅一年癸亥黎州戍軍伍進等作亂折知常遁去
王去惡誘進等誅之癸酉遣蓋經等賀金主生辰十二
月丙申嗣濮王士勗薨

八月春正月罷內侍兼兵職

據趙汝愚傳增輯

三月戊戌除朱

熹提舉江西常平茶鹽夏四月癸酉立郴州宜章桂陽
軍臨武縣學教峒民子弟五月辛卯以久雨減京畿及

兩浙囚罪以下貸貧民稻種錢壬寅以史浩為少師六月己酉放殿前司平江府牧場二萬畝聽民漁採戊午除淳熙七年諸路旱傷檢放錢米辛酉罷諸路坊場監官聽民承買秋七月辛卯以不雨決繫囚八月庚戌趙雄罷癸丑以王淮為右丞相兼樞密使甲寅以謝廓然同知樞密院事己未以觀文殿大學士新四川制置使趙雄知瀘州九月庚辰命諸路提舉司貸民麥種辛己錢良臣罷庚寅以謝廓然兼權參知政事冬十月己酉

遣施師點等使金賀正旦甲子金遣完顏實等來賀會
慶節詔災傷州縣諭民振糶十一月戊寅蠲富陽新城
錢塘夏稅丁酉遣燕世良賀金主生辰巳亥振臨安府
及嚴州饑民辛丑募民振糶十二月癸卯以徽饒二州
民流者衆出南庫錢付浙東提舉常平朱熹振糶辛
亥蠲諸路旱傷州軍明年身丁錢物甲子下朱熹社倉
法于諸路戊辰金遣魏貞吉等來賀明年正旦是月廣
東安撫鞏湘誘潮賊沈師誅之

九年春正月甲戌詔四孟朝獻分用三日如在京故事
丁丑命兩淮戍兵歲一更庚寅貸江浙兩淮旱傷州縣
民稻種戊辰四川制置司獲叙州賊大波浪三月辛未
如佑聖觀振忠萬恭涪四州癸未振鎮江府壬辰遣使
按視淮南江浙振濟甲午罷諸路寄招軍兵三年就揀
軍子弟補其闕夏四月甲辰詔自今盜發所在帥守監
司論罰平定有勞者議賞五月甲寅蠲犒賞庫酒課錢
汀漳二州民為沈師所擾者除其賦戊午謝廓然薨秋

七月甲戌以江西常平義倉及椿管米付諸司預備振糶辛巳出南庫錢付浙東提舉朱熹備振糶壬辰以資政殿學士李彥穎參知政事八月己亥詔紹興去歲己納夏稅應減者為今年之數九月己巳罷諸路科買軍器物料三年庚午以王淮為左丞相梁克家為右丞相丙子以子彤為容州觀察使封安足郡王辛巳大享明堂大赦乙酉以錢引賜瀘州備振糶辛卯封伯圭為榮陽郡王以旱減恭合渠昌州今年酒課乙未禁蕃舶販

易金銀著為令十月戊戌遣王蘭等使金賀正旦辛亥
塞四州沿邊支徑戊午金遣完顏宗回等來賀會慶節
甲子蠲諸路旱傷州軍淳熙七年八年通賦十一月庚
午振夔路饑丙戌遣賈選等賀金主生辰十二月癸亥
金遣富珠哩正等來賀明年正旦

十年春正月丁丑以給事中施師點簽書樞密院事甲
申李彥穎罷丙戌以施師點兼權參知政事三月戊辰
李燾上續資治通鑑長編六百八十七卷辛巳免四川

和羅三年癸未如玉津園巳丑除詐稱災傷籍產法夏
四月丙申再蠲臨安府民身丁錢三年巳亥命湖南廣
西塞溪洞徑路五月戊寅如聚景園辛卯詔疏襄陽水
渠以渠傍地為屯田尋詔民間侵耕者就給之六月戊
戌監察御史陳賈請禁偽學乙巳罷昭州歲貢金巳未
詔諸路監司帥臣歲舉廉吏庚申嚴賊吏禁秋七月乙
丑以不雨決繫囚丙寅如明慶寺禱雨甲戌以夏秋早
曠避殿減膳令侍從臺諫兩省卿監郎官館職各陳朝

政闕失分命羣臣禱雨于天地宗廟社稷山川丁丑除
災傷州縣淳熙八年欠稅八月戊申以施師點參知政
事兼同知樞密院事御史中丞黃洽參知政事庚戌以
史浩為太保魏國公致仕九月丁丑如佑聖觀壬午蠲
諸州逋負內藏庫錢乙酉遣余端禮等使金賀正旦冬
十月乙未詔兩浙義役從民便壬子金遣完顏方等來
賀會慶節十一月壬戌朔日有食之甲戌如龍山大閱
遂至玉津園閏月壬寅却安南獻象丁巳遣陳居仁等

賀金主生辰十二月丙子朝德壽宮行太上皇帝后慶
壽禮推恩如太上皇故事丁亥金遣完顏博勒和等來
賀明年正旦

十一年春正月辛丑安化蠻蒙光漸等犯宜州思立砦
廣西兵馬鈐轄沙世堅討禽之丙午詔江東西路諸監
司義後差後從民便三月辛卯詔刑部御史臺每季以
仲月錄囚徒癸巳命利路三都統吳挺郭鈞彭杲密陳
出師進取利害以備金人甲午以上津潮陽旱蠲其稅

辛丑罷秀州御馬院莊歸其地于民丁未禁淮民招溫
處州戶口除職田官田八年逋租庚戌詔御試策有及
軍民利害者考官袞類以聞夏五月戊子蠲崇德等十
六縣民淳熙十年欠稅甲寅出緡錢犒給四川久戍將
士六月戊午詔諸道總領舉偏裨可將帥者庚申以周
必大為樞密使己卯詔諸州歲買稻種備農民之闕秋
七月癸卯蠲減浙東敗闕坊場酒課癸丑禁諸州遏糶
八月庚申遣章森使金賀正旦九月甲寅再減四川酒

課冬十月乙丑遣王信等賀金主生辰丙子金遣張大節等來賀會慶節盱眙軍言得金人牒以上京地寒來歲正旦生辰人使權止一年壬午詔諸以忠義立廟者兩淮漕臣繕治之十一月壬寅禁福建民私有兵器甲寅令峽州歲時存問處士郭雍十二月己卯戒監司州縣常賦外取民

十二年春正月己丑禁交趾鹽入省地壬辰四川制置使留正遣人誘青羌奴兒結殺之三月乙酉進孫擴為

安慶軍節度使封平陽郡王辛卯禁習渤海樂癸丑除
稅場高等累賞法夏四月甲子如聚景園丙子諫言故
遼達實林牙假道于夏以伐金密詔吳挺與留正議之
己卯如玉津園六月壬戌除諸軍逋欠營運錢秋八月
癸亥以太上皇壽八十令有司議慶壽禮九月丙戌詔
恤湖州台州被水之家庚寅遣王信等使金賀正旦丁
丑詔諸路總領軍帥漕臣守臣歲上屯田所收之數冬
十一月壬辰遣章森等賀金主生辰辛丑合祀天地于

園丘大赦十二月庚戌朔帥羣臣奉上太上皇帝太上
皇后尊號冊寶于德壽宮推恩如紹興三十三年故事
甲子以知福州趙汝愚為四川制置使丙子金遣布薩
守忠等來賀明年正旦

十三年春正月庚辰朔率羣臣詣德壽宮行慶壽禮大
赦中外臣僚並理三年磨勘免貧民丁身錢之半優賜
內外諸軍癸巳以史浩為太傅陳俊卿為少傅嗣濮王
士歆為少保三月甲辰如玉津園夏四月辛亥詔吳玘

結約夏人戊辰再蠲四川和糴軍糧三年辛未如聚景園秋閏七月戊申以敷文閣學士留正簽書樞密院事已酉施師點乞免兼同知樞密院事許之九月遣李獻等使金賀正旦冬十月甲午金遣完顏婁等來賀會慶節十一月戊午詔四川制置司通知馬政量收水渠民包占荒田租庚申遣張叔椿等賀金主生辰丙寅梁克家罷為觀文殿大學士醴泉觀使兼侍讀十二月丙子思州田氏獻納所買黔州民省地詔償其直辛巳減汀

州鹽價歲萬緡甲午陳俊卿薨乙未振臨安府城內外
貧乏老疾之民戊戌大理寺獄空己亥金遣耶律子元
等來賀明年正旦

十四年春正月癸亥出四川椿積米貸濟金洋州及關
外四州饑民二月丁亥以周必大為右丞相戊子以施
師點知樞密院事三月甲子如玉津園夏六月丁亥梁
克家薨己亥減兩浙路囚罪一等秋七月辛丑罷戶部
上供殿最丙午詔羣臣陳時政闕失及當今急務己酉

詔監司條上州縣弊事民間疾苦辛亥避殿減膳徹樂
癸丑命檢正都司看詳羣臣封事有可行者以聞戊辰
兩命給舍看詳監司所條弊事八月辛未賜度牒及米
振紹興府饑癸未以留正參知政事兼同知樞密院事
九月癸卯太上皇帝不豫丙午遣萬鍾等使金賀正旦
乙丑罷增收水渠民田租丙寅除官軍私負冬十月辛
未以太上皇帝不豫赦癸酉分遣羣臣禱于天地宗廟
社稷乙亥太上皇帝崩于德壽殿遺誥太上皇后改稱

皇太后丙子以韋璞等為金告哀使戊寅以滎陽郡王伯圭為攢宮總護使翰林學士洪邁言大行皇帝廟號當稱祖詔有司集議以聞辛巳詔曰大行太上皇帝奄棄至養朕當衰服三年羣臣自遵易月之令可令有司討論儀制以聞甲申用禮官顏師魯等言大行太上皇帝上繼徽宗正統廟號稱宗乙酉百官五上表請帝還內聽政丙戌詔俟過小祥勉從所請戊子帝衰經御素輦還內以顏師魯等充金國遺留國信使己丑金遣田

彥臯等來賀會慶節詔免入見却其書幣甲午詣德壽宮自是七日皆如之十一月戊戌朔詣德壽宮自是朔望昏如之己亥大行太上皇帝大祥自是帝以白布巾袍御延和殿詣德壽宮衰絰而杖如初詔皇太子惇參決庶務庚子皇太子三辭參決庶務不許辛丑詣德壽宮禫祭百官釋服甲辰羣臣三上表請御殿聽政詔俟過祔廟戊申遣胡晉臣等賀金主生辰辛亥冬至詣德壽宮戊午詔皇太子參決庶務于議事堂己未詔三日

一朝德壽宮十二月庚午大理寺獄空癸巳金遣完顏崇安等來賀明年正旦見于垂拱殿之東楹素幄詔禮物母入殿付之有司是歲兩浙江西淮西福建旱振之十五年春正月丁酉朔詣德壽宮凡進行禮戊戌皇太子初決庶務于議事堂乙巳詔免諸州軍會慶節進奉二年詔自今御內殿令皇太子侍立庚申施師點罷甲子以黃洽知樞密院事吏部尚書蕭燧參知政事二月丁亥金遣富察克忠等來弔祭行禮于德壽殿次見帝

于東楹之素幄癸巳遣京鏗等使金報謝三月丙寅權
攢高宗皇帝于永思陵夏四月壬申帝親行奉迎虞主
之禮自是七虞八虞九虞卒哭奉辭皆如之丙戌祔高
宗神主于太廟詔曰朕比下令欲衰經三年羣臣屢請
御殿易服故以布素視事內殿雖詔俟過祔廟勉從所
請然稽諸典禮心實未安行之終制乃為近古宜體至
意勿復有請己丑詔減臨安紹興府囚罪一等民緣攢
宮役者蠲其賦庚寅皇太后令車駕一月四詣德壽宮

如舊禮五月己亥王淮罷壬戌始御後殿詔歲出錢五萬六千餘緡減廣東十二州折納米價錢六月癸酉以新江西提點刑獄朱熹為兵部郎官熹以疾未就職侍郎林栗劾之詔熹仍赴江西熹力辭不赴秋八月甲子朔日有食之九月辛丑大饗明堂以太祖太宗配大赦已酉遣鄭僑等使金賀正旦冬十月癸未金遣王克温等來賀會慶節十一月庚子遣何澹賀金主生辰十二月壬午以朱熹主管西太一宮兼崇政殿說書辭不至

戊子金遣田彥皋等賀明年正旦

十六年春正月癸巳金主雍殂孫璟立甲午封孫柄為
嘉國公丙申黃洽罷巳亥以周必大為左丞相留正為
右丞相蕭燧兼權知樞密院事禮部尚書王蘭參知政
事刑部尚書葛邲同知樞密院事乙巳蕭燧罷丙午皇
太后移御慈福宮戊申以昭慶軍承宣使郭師禹為保
大軍節度使辛亥罷淮西屯田巳未更德壽宮為重華
宮二月辛酉朔日有食之壬戌下詔傳位于皇太子

謹按

御製全韻詩注云史臣稱孝宗自外藩入繼大統而能盡宮庭之孝又力行三年之喪謂其無愧廟號然高宗晏駕未及二年遂爾內禪惟以有病不得日至德壽宮為由云欲不退休不可迹雖襲夫孝名心實怠于政事蓋知恢復之難故為引避之計不顧祖宗之基業惟圖一己之便安豈足語于為君之大體乎 是日皇太子即

皇帝位帝素服駕之重華宮辛未上尊號曰至尊壽皇聖帝
聖帝皇后曰壽成皇后紹熙五年五月壬戌壽皇聖帝
不豫六月戊戌崩于重華殿年六十有八諡曰哲文神
武成孝皇帝加諡紹統同道冠德昭功哲文神武明聖
成孝皇帝廟號孝宗攢于永阜陵

孝宗隆興二年乾道九年淳熙十六年凡二十七
年

欽定續通志卷三十六